

## Inatsisissatut siunnersuummut nassuiaatit

### Nassuiaatit nalinginnaasut

#### 1. Aallaqqaasiut

1.1 Naalakkersuisut 2009-imi ukiakkut assartuussineq pillugu isumalioqatigiissitaq, assartuussinermut suliassaqarfimmi unammilligassat siunissami qanittumi takkuttussat aaqqiissuteqarfigineqarnissaannut siunnersuuteqarnissamik suliakkerneqartoq, pilersippaat.

Assartuussineq pillugu Isumalioqatigiissitap isumaliutissiissutaa ulloq 1. april 2011 tamanut ammasumik saqqummiunneqarpoq. Isumaliutissiissut Assartuussineq pillugu Isumalioqatigiissitap nittartagaani tamanut ammasumik saqqummersinneqarpoq <http://www.transportkommissionen.gl>

Assartuussineq pillugu Isumalioqatigiissitap isumaliutissiissutaani 17.3.3-imi Nuummi umiarsualiviup allineqarnissaanut tunngasumi allassimavoq:

*”Assartuussineq pillugu Isumalioqatigiissitap naliliinera malillugu, Umiarsualiup qeqertaanni umiarsualiviliassaq nutaaq, maannamut immikkoortoq 1-imut killilerneqartoq sananeqartariaqartoq. Immikkoortumi tassani Umiarsualiup qeqertaanni umiarsualivik containerersorfiusoq nutaaq, 320 m-inik talittarfeqartoq, timaatunganilu quersuaq sannavillu ilanngullugit 40.000 m<sup>2</sup>-nik angissusilik sananeqassaaq. Inissisimaffimmi tassani talittarfiup takissusia timaatunganilu nunaminertaq annertunerusumik ajornartorsiutaanngitsumik allineqarsinnaapput, tak. kapitali 11.*

*Assartuussineq pillugu Isumalioqatigiissitap misissuinerisa takutippaat, Nuummi umiarsualiviup pisinnaasai annertusineqanngippata nassiussallu naatsorsuutigisamik amerlissappata amerliartuinnassappatalu, Nuummi umiarsualivimmi pioreersumi pitsaasumik aaqqiisinnaaneq annikilliartuinnassasoq, taamatullu umiarsuarnut Imapik ikaarlugu angalasartunut aningaasartuutit amerliartuinnassallutik. Aningaasartuutitut qaffaatissat annertuujussammata, umiarsualivimmik containerersorfiusumik nutaamik sananissaq inuiaqatigiit aningaasaqarnerannut annertuumik iluanaaruteqarfiussatut isumaqarfigineqarpoq.*

*Nassuiaatigineqareersutut taamatut inerneqarnissaa aamma isumannaatsorujussuussaaq. Pingaartumik Imapik ikaarlugu assartuussinermut atatillugu aningaasartuutitigut sipaarneqarsinnaasunut mianersortumik missiliuisoqaraluartoq, aammalu Nuummi umiarsualivimmi siunissami nassiussat amerlassutsimikkut ineriartornissaat mianersortumik missiliorneqaraluartut, naatsorsuinerit ingerlanneqartut takutippaat, Umiarsualiup*

*qeqertaanni umiarsualivik containerersorfiussaq nutaaq inuiaqatigiit aningaasaqarneranni annertuumik iluanaaruteqarfiussasoq. Aamma taamatut inerniliineq malussajassutsimut naatsorsuinerni ingerlanneqartuni allannngortinneqanngilaq, naak Umiarsualiup qeqertaanni containerersorfiussamik nutaamik talittarfiliornissap iluaqutaasinnaassusia annertuumik annikillisinneqaraluartoq.”*

Assartuussineq pillugu Isumalioqatigiissitap isumaliutissiissutaa Inatsisartut ulloq 17. oktober 2011 Inatsisartuni ullormut oqaluserisassatut UKA 2011/99-itut suliarineqarpoq.

1.2 2012-imi novembarimi Naalackersuisut Kalaallit Nunaannut, Kalaallit Nunaannut aamma Kalaallit Nunaata iluani usinik assartuussinermi siunissami ungasissumi aningaasartuutunik annikillisisiniarluni, Nuummi umiarsualivimmik containerersorfiussumik nutaamik pilersitsinissaq pillugu tunngaviusumik aalajangiineq akuersissuteqarfigaat.

Nuummi umiarsualivimmik nutaamik sananissamut tunngaviusoq ”Inuiaqatigiit aningaasaqarnerannut sunniutaasussamik naliliineq – Nuummi umiarsualiviup allilerneqarnera” 17. maj 2013-imeersumi Aningaasaqarnermut Naalackersuisoqarfik sinnerlugu Rambøll Management Consulting-imit suliarineqartumi kingullermik nassuiarneqarpoq. ”Inuiaqatigiit aningaasaqarnerannut sunniutaasussamik naliliineq – Nuummi umiarsualiviup allilerneqarnera”-ta eqikkarneqarnera Inatsisartunut, Aningaasaqarnermut Akileraartarnermullu Ataatsimiititaliamut aamma Sanaartornermut Ataatsimiititaliamut ingerlanneqarpoq.

Tamanna tunngavigalugu Naalackersuisut aalajangiiffigisassatut siunnersuut UKA 2013/18 ”Nuummi umiarsualivittaassap sanaartorneqarnissaanut ingerlanneqarnissaanillu siunertaqartumik aktiaateqarluni ingerlatsivimmik pilersitsisoqarnissaanik kingusinnerpaamillu UPA2014-imi ingerlatsiviup umiarsualiviullu pissutsinut nalimmassarneqarnissaa pillugit Naalackersuisut 2013-imi suliakkerneqarnissaat pillugu Inatsisartut aalajangiiffigisassaattut siunnersuut.” saqqummiuppaat.

Naalackersuisut Sikuki Harbour A/S 23. december 2013-imi pilersippaat.

Inatsisartut Sanaartornermut ataatsimiititaliaat siunnersuummut ulloq 23. november 2013 isumaliutissiissummik saqqummiivoq. Sanaartornermut Ataatsimiititaliap isumaliutissiissutaanut ilanngussatut tusarniaanermut akissuteqaatit, Sanaartornermut Ataatsimiititaliamit apeqqutit kiisalu Naalackersuisut taakkununga akissuteqaataat ilanngunneqarput. Siunnersuutip suliarineqarneranut ilaatillugu Sanaartornermut Ataatsimiititaliap Nuummi umiarsualivimmik nutaamik sananissamut aalajangertoqassappat tunngaviusussanut naatsorsuutigineqartunullu tunngasut apeqqutit, isornartorsiunerit kaammattuinerillu arlallit suliaaraat.

Sanaartornermut ataatsimiititaliap isumaqatigiissumik inassutigaa siunnersuut akuerineqassasoq. Inatsisartut ulloq 27. november 2013 aalajangiiffigisassatut siunnersuut akueraat.

## **2. Siunnersuummi immikkoortut pingaernerit**

2.1 SIKUKI Nuuk Harbour A/S aktiaatileqatigiiffittut 100 mio. koruunit tikillugit aktiaatinit aningaasaateqartillugu pilersinneqassaaq. Aktiaatinit aningaasaatit ingerlatseqatigiiffiup Nuummi umiarsualivimmi nutaami siunissami aningaasaliisarnissai eqqarsaatigalugit aalajangersarneqarput, taamaalilluni nammineq aningaasaatit akiitsorisassatut naatsorsuutigineqartunut naleqqiullugit naammaginatsumik inissisimallutik.

Ingerlatseqatigiiffiup aktiaatinik aningaasaliissutigineqartut tamaasa Naalackersuisunit atsiorneqassapput uppersarnerneqassallutillu aammalu Namminersorlutik Oqartussanit pigineqassallutik. Taamaaliornikkut aalajangiisuusumik pingaartinneqarpoq, umiarsualivik Kalaallit Nunaannut, Kalaallit Nunaannit aamma Kalaallit Nunaata iluani usinik assartuussinermut qitiulluinnartoq aammalu aalajangiisuulluinnartumik pingaaruteqartoq. Naalackersuisut naliliipput Namminersorlutik Oqartussat ingerlaseqatigiiffiup periusissatigut aalajangiussaannut tamakkiisumik nakkutiginninnissaat, ilanngullugulu umiarsualiviup sullississutaannut akiusussanik aalajangiinernut nakkutiginninnissaat, qulakkeerneqassasoq.

Tamanna tunngavigalugu siunnersuummi Namminersorlutik Oqartussat SIKUKI Nuuk Harbour A/S-imi aktiaataannik tamakkiisumik ilaannakuusumilluunniit tunisisarneq pillugu aalajangersakkanik ilanngussisoqanngilaq. Kingusinnerusukkut paasinarsissagaluarpas tamatumunnga tunngavissaqartoq imaluunniit pissutissaqartoq, Naalackersuisut tamanna pillugu siunnersuummik saqqummiussissapput.

Ingerlatseqatigiiffiup siunertarissavaa Nuummi umiarsualivimmik containerersorfiusumik nutaamik sananissamut pilersarusiornissaq, neqeroortitsinissaq aamma sanaartornissaq kiisalu Nuummi umiarsualivimmi pioreersumi aamma Nuummi umiarsualivimmi nutaami ingerlatsinissaq.

2.2 SIKUKI Nuuk Harbour A/S aktiaatileqatigiiffittut suliffeqarfiussaaq namminersortoq, Namminersorlutik Oqartussanit aamma Naalackersuisunit akiliisussaatsiviunngitsumik imaluunniit tapiiffigineqanngitsumik suliffeqarfimmik ingerlatsisuusoq.

Ingerlatseqatigiiffik siulersuisunit aamma qullersaqarfimmit siulersorneqassaaq. Inatsisartut inatsisissaattut siunnersuut siulersuisuni ilaasortanut aamma qullersaqarfimmi atorfeqartussanut piumasaqaatinik neriulluarnartunik arlalinnik aalajangersaaffiuvoq. Aammattaaq siunnersuummi pisut inuup siulersuisuni toqqarneqarsinnaannginneranut imaluunniit qullersaqarfimmiiginnarsinnaannginneranut pisut arlallit maleruagassiivigineqarput. Aalajangersakkami qulakkeerneqassaaq Nuummi umiarsualiviup

sananeqarnissaanut ingerlanneqarnissaanullu aalajangiisinnaalluartunik pisariaqartunik piginnaaneqartunik aqutsisoqarnissaa.

Ingerlatseqatigiiffik ataatsimeersuarnermi akuersissuteqarnikkut Nuummi umiarsualivimmik containerersorfiusumik nutaamik sananermut atugassatut taarsigassarsiniarsinnaassaaq. Taamaaliornikkut qulakkeerneqarpoq Naalakkersuisut ingerlatseqatigiiffiup ataatsimeersuarnerani aalajangiinertut ingerlatseqatigiiffiup taarsigassarsinnaanissaa. Peqatigitillugu naatsorsuutigineqarpoq nammineq aningaasaatit aallarniutitut akiliutigineqartut aammalu akisussaassuseqartumik taarsigassarsianit aningaasaatit saniatigut, Namminersorlutik Oqartussat Nuummi umiarsualivimmik containerersorfiusumik nutaamik aningaasalersuinermit tapersiissanngitsut.

Aktiaatileqatigiiffiit pillugit inatsit, ukiumoortumi naatsorsuutitut inatsit allallu aktiaatileqatigiiffiit pillugit inatsit, Kalaallit Nunaannut atuutsinneqalersimasut, allannguutit ilassutillu siunnersuut malillugu aalajangersarneqartut aammalu aalajangersakkat siunnersuut naapertorlugu aalajangersarneqartut atuutisillugit, SIKUKI Nuuk Harbour A/S-imut atuutissapput.

2.3. Siunnersuut malillugu SIKUKI Nuuk Harbour A/S Nuummi umiarsualivimmut nutaamut tunngatillugu sananeqarnissaanut pilersarusiussaaq, neqeroortitsissalluni aammalu sanatitsissalluni, aammattaq illuutit umiarsualivimmut atasumik siunertaqartut arlallit ilanngullugit. Taassuma pilersarusiorneqarnera, neqeroortitsivigineqarnera sananeqarneralu ingerlatseqatigiiffiup aningaasaataanit, akisussaassuseqartumik taarsigassarsianit aningaasaatit aammalu avataaniit aningaasalersuisartunit taarsigassarsinikkut aningaasalersorneqassaaq.

SIKUKI Nuuk Harbour A/S-ip massakkut suliniutip suliarineqarnissaa isumagereerppaa, suliniullu neqeroortitigineqareerluni suliarinnittussarsiuussinermilu angusat pissarsiarineqareerlutik.

Massakkuugallartoq Nuummi umiarsualivik nutaqaq immikkoortoq 1-imi 280 m/310 meterinik narlumuinnaq takissuseqartumik talittarfiliortoqassaaq 30 meterinik tallineqarsinnaangorlugu aamma 40.000 m<sup>2</sup>-inik annertussusilimmik containerinik ilioraaviusinnaasumik timaatungaani sanasoqassaaq aammalu PTI-imik usinut navianartunut inissiisarfissamik. Containerinut terminali ISPS-imut isumannaarsagaassaaq aammalu aqquuserngup tamanit atorneqartup tungaanut ungaluligaassalluni. Tassunga ilanngutissapput ilitsivissatut siunertaqartut, assersuutigalugu uuliasiorluni misissuinermit suliaqartunut, nunaminertat ujaraaqpanik qalligaasut 25.500 m<sup>2</sup> missaanni annertussuseqartut.

Naalakkersuisut siunnersuummi kommunip sanaartorfigiuminarssaaneranut aningaasartuutit pillugit Kommuneqarfik Sermersuumut isumaqatigiissuteqarnissamut piginnaatinneqarput,

tamanna Nuummi umiarsualivimmik nutaamik sananermut atatillugu nuna tamakkerlugu pilersaarusiormi soqutigisanik isumaginninnissamut tunngatillugu pissalluni.

Pilersaarusiormi nuna tamakkerlugu malitassani Nuummi umiarsualivimmik nutaamik sananissamut aalajangersakkat erseqqinnerusut akuerinissaannut Naalakkersuisut piginnaatinneqarput. Piginnaatitsissuteqarnermi kommunip pilersaarutaanik tunngavissaqannginnerup imaluunniit taassuma naammanginnerata malitsigisaanik suliassap kinguaattoornissaata pinngitsoortinniarnissaanut Naalakkersuisut periarfissinneqarput. Taamaattoq Kommuneqarfik Sermersuup kommunimut pilersaarummut tapiliussamik, suliassap ilusaa piusoq atorlugu aammalu kinguaattoornertaqanngitsumik naammassineqarnissaanut periarfissiisumik, suliaqarnissaq akuersinissarlu naatsorsuutigaa.

### **3. Pisortanut aningaasaqarnikkut allaffissornikkullu sunniutaasussat**

#### *Allaffissornikkut sunniutaasussat*

Nuummi umiarsualiviup nutaap nunami sanaartugartaqartup illuutitaqartullu pilersaarusiorneqarneranut sanaartorneqarneranullu atasumik oqartussaasut nalinginnaasumik sularinninnerannut allaffissornikkut aningaasartuuteqassasoq naatsorsuutigineqarpoq.

Siunnersuummi § 8 naapertorlugu Pilersaarusiormi nuna tamakkerlugu malitassat sularineqassappata, suliassamut siunnersuut SIKUKI Nuuk Harbour A/S-imit sularineqartoq tunngavigalugu tamanna pisinnaassasoq naatsorsuutigineqarpoq. Suliassamut siunnersuutip nalilersorneqarneranut avataaniit ikiorteqarnissaq pisariaqartinneqarsinnaavoq. Naliliisoqarpoq taamaattoqassappat taakkununga aningaasartuutit aningaasaliissutaareersut iluanni akilerneqarsinnaassasut.

Umiarsualiviup nunami sanaartugartaqartup avatangiisinut inatsit naapertorlugu akuersissuteqarfigineqarnissaa SIKUKI Nuuk Harbour A/S-imit nassuiaat tunngavigalugu pissaaq. Nassuiaatip nalilersorneqarneranut avataaniit ikiorteqarnissaq pisariaqartinneqarsinnaavoq. Naliliisoqarpoq taakkununga aningaasartuutit aningaasaliissutaareersut iluanni akilerneqarsinnaassasut.

Kommuneqarfik Sermersooq kommunimut pilersaarummut tapiliussamik suliaqartussaassaaq akuersisussaassallunilu kiisalu maleruagassat atuuttut naapertorlugit oqartussaasut suliassamut tunngatillugu sularinnittussaassaaq. Pissutsinut immikkut ittunut, Nuummi umiarsualivimmik nutaamik pilersaarusiormi sanaartormullu atasunut nalilersuineranut avataaniit ikiorteqarnissaq pisariaqartinneqarsinnaavoq. Naliliisoqarpoq umiarsualivimmi illuutinik arlalinnik sananissamut pilersaarusiorneq sanaartormerlu avataaniit ikiorteqarnissamik pisariaqartitsiviunngitsumik oqartussaasunit sularineqarsinnaassasoq.

*Nuummi umiarsualivimmik nutaamik pilersaarusiorneq sanaartormerlu*

Umiarsualivimmut nutaamut sanaartornissamut umiarsualivittarpiaanut toqqaannartumillu tassunga atasumut attaveqaqatigiinnermut tunngasunut sanaartornissamut missingersuutit naapertorlugit 227 mio. kr.-iupput. Aningaasaliissutissallu pilersaarutaasunut ilaapput illuutissanut toqqaanartumik aningaasartuutissat 134,3 mio. kr.-init, 56 mio. koruunillu kraaninut angallattakkanut marlunnut atugaassat. Tassunga ilanngutissapput pingaarnertigut pilersaarusiornermut aningaasartuutissat 134,1 mio. kr.-iusut, soorlu pilersaarusiornermut, siunnersorteqarnermut attaveqaqatigiissuutissanullu atugassat, agguarlugit 87 mio. kr.-it umiarsualivittarpiaanut 47 mio. kr.-illu illuutitut. Pilersaarummut aningaasaliissutissat tamarmiusut taamaasillutik 551,4 mio. kr.-inut naatsorsorneqarput. Umiarsualivik nutaaq 2016-imi qaammatit pingasut kingulliit iluanni atorneqalernissaminut piariissasoq naatsorsuutigineqarpoq.

Piffissami sanaartorfiusumi ataatsimut katillugit aningaasat pisariaqartinneqartut sanaartornermi ernialiussat ilanngullugit, suliarinnittussarsiuussineq aamma aningaasaliissutissatut naatsorsuutigalugit 580 mio. koruuninut missingersuusiorneqarput.

#### Aningaasaatinut pisariaqartitsineq - naatsorsorneqartut

Mio kr.	
Suliniuummut aningaasartuutit	134,1
Umiarsualivik sanaartugassaq	227,0
Qeqertanut aqqusernit ingerlaffissat pitsannguinerlu	40,0
Illuutit nutaat (quersuaq, sannavik, allaffeqarfik)	134,3
Kranit il.il.	56,0
Katillugit (2014-imi akit naapertorlugit)	551,4
Missingersuutitigut sillimmatit	10,8
<u>Sanaartornermi ernialiussat</u>	<u>17,8</u>
Aningaasaliissutissatut pisariaqartitat	580,0

Suliariumannittussarsiuussinermi akit aalajangersimasuupput, taamaattumillu akit qaffassinnaaneri ilanngullugit missingersuusiorneqaratik. Illuatungaatigut missingersuutitigut sillimmatinik ilanngussisoqarsimavoq suliniutip ingerlanerata nalaanni ingerlatseqatigiiffiup ingerlatsineranut il.il. atorneqarsinnaasussanik

#### Aningaasat pisariaqartitat - aningaasalersuineq

Mio. kr.	
Aningaasaatinik aallarniutissatut aningaasanngorlugit akiliutit	70,0
Akisussaassuseqartumik taarsigassarsianit aningaasaatit	110,0
<u>Taarsigassarsiat – aningaasalersuisartunit</u>	<u>400,0</u>
Katillugit	580,0

Aktiaatileqatigiiffik nutaaq aningaasaatinik tigorianaannarnik 180 mio. koruunit tikillugit aningaasaateqalersinneqartussatut missingersuusiorneqarpoq, taakkunanga tigorianaannartut nammineq aningaasaatit 70 mio. koruunit tikillugit annertussuseqassallutik kiisalu akisussaassuseqartumik taarsigassarsiatut aningaasaatit 110 mio. koruuniussallutik. Aningaasaatini pisariaqartinneqartut sinneruttut 400,0 mio. koruuniusut nalinginnaasumik atugassaqartitsiviusumik taarsigassarsinikkut matussuserneqassasut naatsorsuutigineqarpoq.

Ingerlatseqatigiiffik 55 mio. koruuninik Namminersorlutik Oqartussanit akilerneqartunik aktiaatinit aningaasaateqartillugu pilersinneqarpoq. Umiarsualiviup nunaminertai pioreersut 30 mio. koruuninik naleqartillugit aallarniutitut aningaasaliissutigineqassapput. Tamatuma saniatigut 25 mio. koruunit ingerlatseqatigiiffiup pilersinneqarneratigut toqqaanartumik aningaasaliissutigineqarput.

Inatsisartut Aningaasaqarnermut Akileraartarnermullu ataatsimiititaliaata ulloq 19. december 2013 (suliaq nr. 13-644) 2013-imut ilassutitut aningaasaliissutissat aktiaatileqatigiiffimmik Nuummi umiarsualivimmik containerersorfiusumik nutaamik ingerlatsinissamik pilersitsinissamillu siunertaqartumut pilersitsinermut atatillugu Naalakkersuisunut aningaasanngorlugit 25 mio. koruuninik akiliuteqarnissamik, 110 mio. koruuninik akisussaassuseqartumik taarsigassarsinikkut aningaasaateqarnissamut kiisalu umiarsualiviup pioreersup aallarniutissatut akiliutigineqarnissaanik piginnaatitsissuteqartoq akueraat. Inatsisartut Aningaasaqarnermut Akileraartarnermullu Ataatsimiititaliaat aamma aalajangiivoq 10.13.10-imi Iluanaarutit, aktianik piginneqatigiiffinniit piginneqataassutit tunisinerillu, isertitassatut aningaasaliissutit Royal Arctic line A/S-imit iluanaarutit annertunerulersut aqutugalugit 25 mio. koruuninik qaffanneqassasut.

Akisussaassuseqartumik taarsigassarsiat kr. 110 mio. aningaasalersorneqarput imatut, - kontomi pingaarnermi 89.71.40 Nukissiorfiit, sanaartornermut taarsigassarsiarititat, suliassami normu 996.17.772 imilerineq, aningaasaliissutit 15 mio. koruuninik annikillisillugu aamma suliassami normu 996.17.769 Nukissiorfinnut taarsigassarsiarititat, aningaasaliissutit 85 mio. koruuninik annikillisillugit, - kontomi pingaarnermi 89.71.41 Nukissiorfiit, sanaartornermut taarsigassarsiarititat, sanaartorfissagissaaneq, suliassami normu 060.28.029 Immikkut sanaartorfissagissaaneq Qinngorput, aningaasaliissutit 5 mio. koruuninik annikillisillugit aamma suliassami normu 996.28.028 Sanaartornermut taarsigassarsiarititat, sanaartorfissagissaaneq, aningaasaliissutit 5 mio. koruuninik annikillisillugit.

2013-imi decembarimi immikkut ittumik iluanaarutinit akiliuteqarnissaq pillugu aalajangiinissamut Royal Arctic Line A/S-imi immikkut ittumik ataatsimeersuartoqarpoq. Namminersorlutik Oqartussat 110 mio. koruuninik akisussaassuseqartumik taarsigassarsisitsissasut SIKUKI Nuuk Harbour A/S taarsigassarsinissamut isumaqatigiissuteqarfigineqarpoq. Akisussaassuseqartumik taarsigassarsinermut atugassarititaasussat ilusilersorneqarneranni, taanna sullissiviit aningaasalersuisartut

SIKUKI Nuuk Harbour A/S-imi akiitsorsinnaanermut nalilersuinerani nammineq aningaasaatinut taarsiullugu tamakkiisumik atorneqarsinnaassaaq.

#### *Ingerlaavartumik ingerlatsinerup aningaasalersorneqarnera*

Aktiaatileqatigiiffimmut aningaasartuutit ingerlaavartut aallaqqaammut qaffasittussaapput, tassani aningaasalersuineranut aningaasartuutit aningaasartuutini ataatsimoortuni initoorujussuussallutik. Ingerlatsineranut aningaasartuutit 2017-imi 9 mio. koruunit missaanniissasut 2022-imi 11 mio. koruunit missaannut qaffassasut naatsorsuutigineqarpoq. Aningaasalersuineranut aningaasartuutit nalikilliliinerillu 2017-imi 42-44 mio. koruunt akornanniittussatut 2022-imi 38 – 40 mio. koruuninut ikilissasut naatsorsuutigineqarpoq aammalu taarsigassarsiat akilersorneqarnerat aammalu ernianut akiliutit annikilliarernerat ilutigalugu inissisimanerup appariarernerani qaffakkiartussallutik.

Aktiaatileqatigiiffimmi kaaviiartitat 2017-imi 49 -51 mio. koruunit missaanniissasut 2022-imi 55-57 mio. koruuninik amerlassuseqalerlutik qaffassasut naatsorsuutigineqarpoq. Ingerlatseqatigiiffiup kaaviiartitaasa annertunersaat nunaminertanik, illuutinik karaaninillu attarernerut tunngallutik Royal Arctic Line A/S-imeersuussasut naatsorsuutigineqarpoq. SIKUKI Nuuk Harbour A/S-ip mianersortumik missingersuusiorsimavaa assartortakkat ikinnerunissaat aammalu aatsitassarsiornermut tunngatillugu suliaasaqannginnissaq. Taakku illuatungilerneqarput umiarsualivimmik nutaamik sanaartornissami ileqqaarutissat tamatumalu kingorna ingerlatsinerit aqqutigalugit.

Ataatsimut isigalugit ingerlatseqatigiiffik ukiumi siullermi annikitsuaqqamik sinneqartooruteqassasooq, kisiannili aningasalersuineranut aningaasartuutit annikilliarernerat ilutigalugu qaffariartussasut naatsorsuutigineqarpoq.

Isertitassanut aningaasartuutissanullu missiliuinerit matuma siulianiittut annertuumik nalorninartortaqarput. Pingaartumik pissutigalugu aningaasalersuisartunut taarsigassarsinissamut atugassarititaasut pillugit isumaqatigiissuteqartoqanngimmat.

#### **4. Inuussutissarsiortunut aningaasaqarnikkut allaffissornikkullu sunniutaasussat**

SIKUKI Nuuk Harbour A/S-imi pilersitsinissamut aammalu Nuummi nutaamik umiarsualiviliornissamut siunnersuut imminermini inuussutissarsiortunut aningaasaqarnikkut imaluunniit allaffissornikkut sunniuteqassanngilaq.

SIKUKI Nuuk Harbour A/S-imi pilersitsinissamut siunnersuut manna, Naalakkersuisut peqatigisaanik umiarsualiviit pillugit Inatsisartut inatsisissaattut siunnersuutaannut ataqatigiissillugu isigineqassaaq. Umiarsualiviit pillugit Inatsisartut inatsisissaattut siunnersuummi umiarsualiviit namminersortunit ingerlanneqarnerannut inatsisitigut




sinaakktissat pilersinneqassapput aammalu umiarsualivimmik nunami sanaartugartaqartumik atuinnermut akiliisitsisalnissamik periarfissartaqarluni.

Aktiaatileqatigiiffimmi kaaviiartitat 2017-imi 49 -51 mio. koruunit missaanniissasut 2022-imi 55- 57 mio. koruuninik amerlassuseqalerlutik qaffassasut naatsorsuutigineqarpoq. Ingerlatseqatigiiffiup kaaviiartitaasa annertunersaat nunaminertanik, illuutinik kraaninillu attartornermut tunngallutik Royal Arctic Line A/S-imeersuussasut naatsorsuutigineqarpoq. Tassunga ilanngutissapput ingerlatanit ullumikkut akiliuteqarfigineqarneq ajortunit isertitat kiisalu ingerlatanit nutaanit isertitat, pingaartumik aatsitassarsiornermik suliaqarnernut atatillugu.

Ataatsimut isigalugit ingerlatseqatigiiffik ukiumi siullermi annikitsuaqqamik sinneqartooruteqassasoq, kisiannili aningaasalersuinnermut aningaasartuutit annikilliarturnerat ilutigalugu qaffariartussasut naatsorsuutigineqarpoq.

Naliliisoqarpoq Nuummi umiarsualivimmik nutaamik sanasoqarnera apeqquaatinnagu assartuusinnermut akiusut qaffannissaat naatsorsuutigineqartariaqartoq. Kisiannili naliliisoqarpoq Nuummi umiarsualivimmik nutaamik sanaartortoqangippat assartuusinnermut akiusut qaffaataat annertunerusussaasut. Naliliisoqarpoq Nuummi umiarsualivimmik nutaamik sanaartornerup kingunerisaanik assartuussinnermut akiusuni qaffaatissat annertuumik annikillissasut.



(najoqqutarisaq: Inuiaqatigiinni aningaasaqarnikkut sunniutaasussanik nalilersuineq – Nuummi umiarsualiviup allilernerqarnera)

Naliliisoqarpoq Royal Arctic Line A/S-ip aningaasartuutai qaffassasut, aammalu assartuussinnermut akiusut qaffannissaasa pisariaqartinneqarnera, umiarsualivik allineqangippat annertunerulissasoq, pissutigalugu maannakkut umiarsualiviusumi suliaqarnerit inissaaleqititsineq pissutigalugu sunniuteqanginneruleriartormata, aammalu,

pissutigalugu Royal Arctic Line A/S-ip umiarsuit usisinnaasaat qaangerneqaraangata usisussanik attartortariaqartarnera annertusiartormat. Umiarsuit angissusaasigut angininngortitsisoqarsinnaanngilaq, pissutigalugu angissusaat Nuummut, Sisimiunut aamma Aasiannut talissinnaanissaannut naleqqussagaasussaammat aammalu maannakkut Nuummi containerinut terminalimi umiarsuit imarpikkoortaatit usii tamaasa inissaqartinneqanngimmata.

Naalackersuisut SIKUKI Nuuk Harbour A/S-imi aamma Royal Arctic Line A/S-imi piginnittut, ingerlatseqatigiiffiit marluk taakkua akornanni isumaqatigiissutini kajumissuseqalersitsinissamut ilusiliinerup, aningaasartuutinik ikilisitsinissamik aallussiviusup aammali ingerlaavartumik ingerlatsinermik pitsanngorsaasussap kiisalu sunniuteqarluarnerulersitsiniarnernik qulakkeerisup takuneqarsinnaanissaanut peqataanissaq kissaatigaat, taamaalilluni assartuusinnermut akiusunik qaffaanissamut pisariaqartitsineq annikinnerulersinneqassalluni.

Nuummi umiarsualivik nutaaq Royal Arctic Line A/S-imi ukiumut 30 mio. koruunit missaannik sipaartitsisinnaassasoq naatsorsuutigineqarpoq. Naliliisoqarpoq tamatuma saniatigut ukiumut 10 – 15 mio. koruunit missaanniittut aningaasalersuinissamut nassaarineqartariaqassasut, taakkuli SIKUKI Nuuk Harbour A/S-ip pilersinneqarnerani naatsorsuutigineqarsimasut affaanit annikinnerupput. Assartuusinnermut akiusut qaffatsinnissaat periarfissaasinnaavoq. Inatsisit atuuttut malillugit assartuusinnermut akiusut taakkualu agguataarnerat Naalackersuisunit akuersissuteqarfigineqartartussaapput.

Nunami sanaartukkat ilanngullugit umiarsualivimmik atuinermut akigititat akigititanullu tunngaviusut Naalackersuisunit akuerisaasussaassapput.

## **5. Avatangiisinut, pinngortitamut inuillu peqqissusaannut sunniutaasussat**

Naliliisoqarpoq siunnersuut imminermini avatangiisinut, pinngortitamut aamma inuit peqqissusaannut sunniuteqassanngitsoq.

2013-imi novembarimi Nuummi umiarsualiviup allilerneqarnissaanut tunngatillugu VVM-imut nassuiaat suliarineqarpoq. VVM-imut nassuiaat sanatitsisoq sinnerlugu Rambøll-imit suliarineqarpoq. VVM-imut nassuiaammi Nuummi umiarsualivimmik angallannermut sanaartugartaqartumi nutaami sanaartornerup ingerlatsinerullu malitsigisaanik avatangiisinut sunniutaasussat nalilersorneqarput.

Avatangiisinut Pinngortitamullu Naalackersuisoqarfiup Nuummi umiarsualiviup allilerneqarnissaanut tunngatillugu VVM-imut nassuiaat tusarniaassutigaa. VVM-imut nassuiaat uani [www.Naalackersuisut.gl/tusarniaanerit](http://www.Naalackersuisut.gl/tusarniaanerit) piffissami 19. december 2013 – 20. februar 2014 tamanut saqqumitinneqarpoq.

Nalunaarusiat tekniskiusut allat tusarniaanermut najoqqutassani ilaatinneqanngitsut Peqqissutsimut Attaveqarnermullu Naalakkersuisoqarfiup nittartagaani tamanut saqqumitinneqarput uani

<http://naalakkersuisut.gl/da/Naalakkersuisut/Departementer/Sundhed-og-Infrastruktur/Infrastruktur/Havne-og-lufthavne/Borgermoede-om-havne>

Atortut ilaasa avatangiisinut sunniutaannik nalilersuineq aamma avatangiisinik nakkutilliinermut akiliutit pillugit Namminersorlutik Oqartussat nalunaarutaat nr. 5, 27. marts 2013-imeersumi § 9, imm. 2, nr. 2 naapertorlugu ulloq 16. januar 2014 Katuami innuttaasunik ataatsimiititsisoqarpoq.

Sanaartugassanik pilersaarusiornermut ilaatillugu SIKUKI Nuuk Harbour A/S-ip avatangiisinik allanngutsaaliuineq pillugu Inatsisartut inatsisaanni nr. 9, 22. november 2011-imeersumi § 41 aamma atortut ilaasa avatangiisinut sunniutaannik nalilersuineq aamma avatangiisinik nakkutilliinermut akiliutit pillugit Namminersorlutik Oqartussat nalunaarutaat nr. 5, 27. marts 2013-meersoq naapertorlugit umiarsualiviup nunami sanaartugartaqartup akuersissuteqarfigineqarnissaa pillugu Naalakkersuisunut qinnuteqaat pisariaqartoq suliarissavaa.

2014-imi ukiakkut pilersaarummut VVM akuersissutigineqarpoq.

Nuummi umiarsualivik umiarsuarnik anginerusunik tikiffigineqarsinnaalluni inissaqartitsiviussaaq aammalu nuna tamakkerlugu umiarsualivittut pingaarnertut atuutissalluni. Tamatuma nuna tamakkerlugu sunniuteqarluarnerusumik sullissinissaq periarfissaqartilissavaa, pissutigalugu usit Kalaallit Nunaannukartut umiarsuarni anginerusuni nalinginnaanerusunilu aammalu avatangiisinut mingutsitsinnginnerusuni assartorneqarsinnaalissammata.

## **6. Innuttaasunut sunniutaasussat**

SIKUKI Nuuk Harbour A/S-imik pilersitsinissamut aamma Nuummi umiarsualivimmik nutaamik sanaartornissamik siunnersuut imminermi innuttaasunut aningaasaqarnikkut allaffissornikkullu sunniuteqassanngilaq.

Imm. 4-imi matuma siuliani allassimasutut naliliisoqarpoq, assartuussinermut akiusut qaffannissaat Nuummi umiarsualivimmik nutaamik sanasoqaraluarpat sanasoqanngikkaluarpalluunniit pinngitsoorneqarsinnaanngitsoq. Allassimasutut naliliisoqarpoq Nuummi umiarsualivimmik nutaamik sananermi qaffaatissat annikillisinneqarsinnaasut.

Assartuussinermut akit qaffannerat inuussutissarsiortunut nammakkiisussat, pingaarnertigut atuisartunut tutsinneqassasut naatsorsuutigineqartariaqarpoq.

## 7. Sunniutaasussat pingaarutillit allat

Kalaallit Nunaanni umiarsualivimmi atortorissaarutininik anginerusunik, siunissami sinerissami niuernerimik tunngaveqartumik aatsitassarsiornermik ingerlatanik sullissisartussanik peqarnera killeqarpoq. Canadami umiarsualivik qaninneq misissuinerimik suliaqartunik passussisinnaasoq, 1.800 km (1.000 sømil) missaanni Nuummiit ungasissusilimmi New Foundland-imi St. John-imiippoq. Kalaallit Nunaanni kitaani misissuinerimik ingerlatanut atatillugu pingaartumik Nuummi aamma Aasianni umiarsualiviit atornerqarput, maannamut tunngaviusoq killiliisuusoq tassaasimalluni umiarsualiviit timaanni nunataat.

Containerinik siammarterisarnermut tunngatillugu oqaatigineqassaaq Royal Arctic Line A/S-ip umiarsuaatai imarpikkoortaatit Nuka aamma Naja Arctica tamarmik immikkut 700 TEU-inik useqarsinnaasut ullumikkut Kalaallit Nunaanni umiarsualivinnut taamaallaat sisamanut talissinnaammata. Narsaq, Nuuk, Sisimiut aamma Aasiaat. Umiarsualiviit sinneri feederersortunik aamma umiarsuarnik nunaqarfiliartaatinik sullinneqartarput. Taamaattoq Kalaallit Nunaata kujataa piffissami maajimiit aggustimut piffissami sivisuumi sikorsuaqarneranik sunnersimaneqartarpoq. Tamatuma malitsigisaanik umiarsuit imarpikkoortaatit Narsamut talissinnaaneq ajorput taamaattumillu nioqqutissat nillataartumiittussat Nuummi umiarsualivimmut umiarsuarmut feederersortumut aqqusaartinneqartarput, taanna sikusiorsinnaassuseqarnerunermini ajornannginnerusumik sikusiorsinnaasarmat.

Nuummi umiarsualivik umiarsuarnik anginerusunik taliffigineqarnissamut inissaqartitsilissaaq, aammalu nuna tamakkerlugu umiarsualivittut pingaarnertut atuutissalluni. Tamatuma nuna tamakkerlugu sunniuteqarluarnerusumik sullissinissaaq periarfissaqartilissavaa, pissutigalugu usit Kalaallit Nunaannukartut umiarsuarni anginerusuni nalinginnaanerusunilu aammalu avatangiisinut mingutsitsinnginnerusuni assartorneqarsinnaalissammata. Tamatuma kingorna usit Nuummi umiarsuarnut umiarsualivinnut minnerusunut talinnissamut immikkut ilusilersugaasunut usilersuuteqqinneqarsinnaassapput.

Naalackersuisut kingusinnerpaamik UPA2014-imi pilersitsinissamut sanaartornissamullu inatsimmik, ingerlatseqatigiiffiup siunertaanik aalajangersaaffiusumik saqqummiussinissamut UKA2013/18-p ataani peqquneqarpoq. Tamannali ajornarsimavoq arlalinnik peqquteqartumik ilaatigut qinersinissamik nalunaaruteqarnermik. Taamaattumik inatsisissatut siunnersuummik saqqummiussineq UPA2015-imi pivoq. Saqqummiussinerup aatsaat UPA2015-imi pinerata sunniuteqarnissaa naatsorsuutigineqanngilaq.

Matumani oqaatigineqassaaq, SIKUKI Nuuk Harbour A/S-imit ingerlanneqarsimmamata umiarsualiviliornissamit pilersaarusiornerup ingerlanneqarnera, niuernikkut pilersaarummit annertussutisimillu pissutsinut missingiuusianullu maannakkorpiaq pisunut naleqqussaasimaneq. Tamanna tunngavigalugu aningaasaqarnikkut naatsorsuutigisani pingaarutilinnik pitsanngorsaait ingerlanneqarsimapput ilaatigut pilersaarummit naleqqusnaanikkut ilaatigullu matuma nassatarisaanik aaqqissuussaaneermik naleqqussaasimaneq. Tamatuma kingunerisimavaa, naak ingerlatseqatigiiffimmit aatsitassarsiornerup tungaanit isertitassanik missingersuusiortoqarsimannikkaluartuq naallu naatsorsuutigineqaaqaarsimasumit assartukkatigut annertussutsit annikinnerusut missingersuusiorneqarsimagaluartut, taava peqatigitillugu iluatsinneqarsimavoq Royal Arctic Line A/S-imut ukiumoortumik attartornermut akiliutit ingerlatseqatigiiffimmik pilersitsinermi naatsorsuutigineqaaqaarsimasuninngarnit 65%-ip missaannik annikinnerusumik missingersuusiorneqarsinnaasimaneeri.

Pilersaarummit tunniussinerup kingorna Sikuki Nuuk Harbour A/S-imit naammassisinnaasat aamma ilusilerneqarsimaneera naatsorsuutigineqaaqaartumut sanilliullugit peqqissaartumik eqqarsaatigineqarsimapput. Naliliineq unaasimavoq unaallunilu, pilersaarutip annertussusianik annikillisisoqarsinnaasooq, atorsinnaassusia eqqunngikkaluarlugu umiarsualivimmullu pingaaruteqaqisumik logistikeqartitsinissaq (ingerlanneqartussamik piareersarnek aqutsinerlu). Peqatigitillugu arlalitsigut periarfissiisoqarsimavoq pitsaanerusumik logistikkeqarnissaq aamma siunissami umiarsualiveqarfimmit illuutinillu annertusaasinnaanissamut eqaatsunik sinaakkusiisinaanissaq. Tamakkiisumik isigalugu tamanna ima kinguneqarpoq:

- Umiarsualivik atorluarsinnaasooq umiarsualiveqarnissamik ingerlatsinermut pitsaasumik logistikkilik (ingerlanneqartussamik piareersarnek aqutsinertalik).
- Umiarsualivik illutaalu ingerlaavartumik ineriartortinneqarsinnaasut annertusisinneqarsinnaasullu pisariaqartitsisoqalissagaluarpit.
- Pilersaarummi sipaarutissat annertuut ilanngunneqarsimasut.

Sammininneq unaasimavoq sanaartortitsisut (entreprenørit) suliassamik kivitsisinnaasut akornanni naammaginartumik unammillernermik pisoqarnissaata qulakkeerneqarnissaa, peqatigitillugu najukkami inuiaqatigiit iluaquserneqarlutik. Eqqarsaatiginnilluartoqareemat toqqarneqarpoq pilersaarutip Tamakkiisumik suliarinnittussarsiuussinissamut neqeroortigineqarnissaa. Unammillertoqarnissaanut aalajangiisartut ukuusimapput: akia, pitsaassuseq, misilittakkat, sulisinnaasunik kalaallinik atuineq kiisalu ilinniartunik (lærlinginik) atorfinitsitsineq siunertaralugu aningaasaqarnikkut pitsaanerpaamik neqeroorteqartuqarnissaata aalajangiusimaneqarnissaa.

Sulisinnaasunik kalaallinik ilinniartunillu atuinissaq eqqarsaatigalugu, pilersaarutip ingerlanneqarneranut atatillugu akunnerit atorneqartussat neqeroorfigineqarsimapput. Akunnerit neqeroortigineqartut assersuutigalugu sulisinnaasunut ilinniagalinnut ilinniagaqanngitsunullu atorneqarsinnaapput, akunnernut siunnersuisumi atorneqartunut,

sanaartorfiup allaffissornikkut isumagineqarneranut, ilinniartunut aamma ingeniørinngorniarlutik misilitsittunut (praktikantinut). Tamakku sulisuussapput piffissami suliariumannittussarsiuussinerup nalaani Kalaallit Nunaanni najugaqarsimasut, sanaartortitsisuni, sanaartortitsisuni pingaanginnerusuni, siunnersortini il.il. Tamatumunnga ilaavoq akunnermut ataatsimut atorineqanngitsoortumut akiliisitsisoqartarnissaanik peqqusisoqarsimanera. Nalilerneqarpoq, taamaasiornermut sanaartortitsisut tunuliaqutillit najukkami sulisinnaasunik atuinissamut annertuumik kajumissuseqartuussasut.

Pilersaarummut atortussat imatut ilusilersorneqarsimapput, Atorsinnaasutut neqeroorutitut taaneqarsinnaallutik atorsinnaassutsinut arlalinnut piumasaqaatitalittut aamma sanaartortitsisumut qinersisinnaanermik periarfissalittut. Taamaasiornikkut neqerooruteqartut pilersaarummit sapinngisamik annertunerpaamik piumasaqaatit suunerinut sanilliullugit pitsaanerpaanngortitsisinnaalersillugit. Taamaasiornikkut nalilerneqarpoq tunisassioriaatsit sanaartoriaatsillu nassaarineqarsimassasut, pitsaassutsimik sunniinngikkaluarlutik pisariitsut. Nalilerneqarpoq, atorsinnaasutut neqeroorutip kingunerisimassagaa aningaasartuutit annertuumik killilersimaarsimasinnaanerat.

Tamakkiisumik isigalugu tamanna ima kinguneqarpoq:

- Erniat ilanngunnagit kisiannili sanaartugaq, illuutit, atortulersuutit, kranit (kivittaait)
- nikisinneqarsinnaasut, pilersaarusernermi aningaasartuutit aamma naatsorsuutiginnisamik aningaasartuutit ilanngullugit katillugit sanaartornermut aningaasat 551,4 mio. kronit, taakkulu naatsorsuutigeqqaakkaminngarnit 100 mio. kronit missaannik annikinnerupput.
- Sulisinnaasunik ilinniartunillu annertuumik atuneq, taakku najukkami sulisinnaasunik piginnaasatigut ingerlatseqatigiiffinnillu qaffassaanerup qaavatigut aamma inuiaqatigiinni siuariartornermik pilersitsisoq. Neqeroorutigineqarsimapput pilersaarummi kalaallinik sulisinnaasunik akunnernik 130.000-inik atuisinnaanissaq kiisalu ilinniartunut akunnernik 20.000-inik. Tamakku ataatsimut katillugit amerlaqatigaat ukiumi ataatsimi ulloq naallugu sulisinnaasutut atorfiit 90-it missaat, taakkununngu ilanngunneqarsinnaapput kiffartuussinikkut ingerlatseqatigiiffinni, piginnaanngorsaanerni il.il. kingunerisinnaasatut sunniutit.

## **8. Oqartussaasunut soqutigisaqaqatigiinnullu il.il. tusarniaaneq**

Siunnersuut piffissami 8. januar - 12. februar 2014 tusarniaassutigineqarpoq. Siunnersuut makkununnga nassiunneqarpoq:

KANUKOKA

Qaasuitsup Kommunia

Kommuneqarfik Sermersooq

Kommune Kujalleq  
Qeqqata Kommunia  
KANUNUPE  
KNAPK  
SIK  
Nuuk Transport A/S  
NUSUKA  
Kalaallit Nunaanni Sulisitsisut Peqatigiiffiat (GA)

Royal Arctic Line A/S  
Royal Greenland A/S  
KNI A/S  
SIKUKI Nuuk Harbour A/S

Aningaasaqarnermut Nunamullu Namminermet Naalakkersuisoqarfik  
Aalisarnermut, Piniarnermut Nunalerinermullu Naalakkersuisoqarfik  
Avatangiisinut Pinngortitamullu Naalakkersuisoqarfik  
Ineqarnermut Naalakkersuisoqarfik  
Peqqissutsimut Attaveqarnermullu Naalakkersuisoqarfik  
Ilaqutariinnermut Inatsisinillu Atuutsitsinermet Naalakkersuisoqarfik  
Inuussutissarsiornermet, Aatsitassaqaqarnermut Suliffeqaqarnermullu Naalakkersuisoqarfik

Tusarniaanermut piffissaliussap naanerani makkunanga tusarniaanermut akissuteqaatit tiguneqarput

Qeqqata Kommunia  
Kommuneqarfik Sermersooq  
SIK  
Nuuk Transport A/S  
Kalaallit Nunaanni Sulisitsisut Peqatigiiffiat (GA)

Tusarniaanermut akissuteqaatit teknikkimut imaluunniit oqaasertanut pissutsinut tunngassuteqartut annertunerusumik oqaaseqarfiginagit Inatsisartut inatsisissaattut siunnersuummi nassuiaatitaqartumi matumani ilanngunneqarput.

Tusarniaanermut akissuteqaatit allat tiguneqartut matuma kinguliani annertunerpaatigut issuarneqarput, Naalakkersuisut taakkununga oqaaseqaataat aamma ilanngunneqarlutik.

Naalakkersuisut ajuusaarutigaa, sulisunik isumalluuteqaqarnerup tungaatigut tunngaveqartumik UPA2014-imi inatsisissatut siunnersuummik saqqummiussinissaq ajornarsimammat. Taamaattumik inatsisissatut siunnersuummik UPA2015-imi saqqummiussineq pissaaq.

Taanna sapinngisamik oqaaseqaatini inatsimmilu tulluarsarlugu ilanngunneqassaaq. Taamaattorli Inatsisartuni aalajangiiffigisassatut siunnersuummi issuakkani suli takuneqarsinnaavoq kingusinnerpaamik UPA2014-imi saqqummiunneqassasoq. UPA2015-imi saqqummiussinissamat kinguneqartitsinissaq naatsorsuutigineqanngilaq.

### **Kommuneqarfik Sermersooq**

*”Kommuneqarfik Sermersooq 9. januaari 2014 Naalackersuisut Siulittaasuata Naalackersuisoqarfiani Ingerlatseqatigiiffinnut Allattoqarfianit tusarniummik tigusaqarpoq, pineqarluni ”SIKUKI Nuuk Harbour A/S pilersinneqarnissaa sanaartorneqarnissaalu pillugit inatsisartut inatsisissaattut siunnersuut”:*

- a) SIKUKI Nuuk Harbour A/S pilersinneqarnissaa sanaartorneqarnissaalu pillugit inatsisartut inatsisissaattut siunnersuummut tusarniuteqarluni allakkat*
- b) SIKUKI Nuuk Harbour A/S pillugu inatsisartut inatsisissaattut siunnersuut*
- c) SIKUKI Nuuk Harbour A/S pillugu inatsisartut inatsisissaattut siunnersuummut oqaaseqaatit*

*Ataatsimut isigalugu Kommuneqarfik Sermersooq Umiarsualiup qeqertaanni Umiarsualiviliortoqarniarnanumut isumalluarterujussuvoq. Kommuneqarfik Sermersooq Nuummi nutaaliaasumik umiarsualiviliortoqarnissamik ilungersuuteqarnermi tapersersuivoq, umiarsualiviullu sanaartorneqarluni manna aallartinneqalerneranut qilanaarluni.*

*Kommuneqarfik Sermersuup tungaaniit periarfissaq una atorlugu uppernarsarusunneqarpoq, nutaamik umiarsualiviliortoqarnissaanut tunngatillugu Peqqissutsimut Attaveqarnermullu Naalackersuisoqarfiup aamma Kommuneqarfik Sermersuumi Sanarfinermut Avatangiisinullu Ingerlatsiviata akornanni pitsaasumik tutsuigeqatigiittumillu suleqatigiittoqartoq. Kommuneqarfik Sermersuup isumaa naapertorlugu, annertuumik sanaartornissamik pilersaaruteqarluni suliaqartoqartillugu suleqatigiinneq pisariaqartoq.*

*Taamaalilluni suleqatigiinnerup Kommuneqarfik Sermersuup tungaaniit attatiinnallaqquneqarpoq.*

*Taamaattumik nuannaarutiginarpoq, SIKUKI Nuuk Harbour A/S pilersinneqarnissaa sanaartorneqarnissaalu pillugit inatsisartut inatsisissaattut siunnersuutikkut Naalackersuisut pisinnaatinneqarmata, Nuummi nutaamik umiarsualiviliortoqarnissaanut kommunip sanaartorfigissaanissaanut atatillugu isumaqatiginninniaqataanissamat akileeqataanissamullu.*

*Akerlianilli SIKUKI Nuuk Harbour A/S pillugu inatsisartut inatsisissaattut siunnersuut tassungalu nassuiaammi pilersaarusiornermi nuna tamakkerlugu malitassaliorsinnaanermut tunngasortai paasiuminaatsortaqarlutilluunniit imminnut naapertuutinnigitsoqarsorinarput.*



*SIKUKI Nuuk Harbour A/S pilersinneqarnissaa sanaartorneqarnissaalu pillugit inatsisartut inatsisissaattut siunnersuutip § 8 imm. 1 aamma 2-mi allaqqavoq, Naalakkersuisut pilersaarusiordermi nuna tamakkerlugu malitassani akuerisinnaagaat (ataatigut titagarput), soorlu kommunimut pilersaarut inatsisitigut atuuttuulersitsisarnituulli.*

*Inatsisissatut siunnersuummi taamatut oqaasertaliineq Pilersaarusiordermi inatsisip aalajangersagartaanut siunertaanullu naapertuuppoq, taamaattumillu SIKUKI Nuuk Harbour A/S pillugu inatsisartut inatsisissaattut siunnersuummi Naalakkersuisut pilersaarusiordermi nuna tamakkerlugu malitassaliorsinnaanerit erseqqissarneqarneranut Kommuneqarfik Sermersooq annertunerusumik oqaaseqaatissaqanngilaq.*

*Taamaattorli Kommuneqarfik Sermersuup tungaaniit paasiuminaatsinneqarluni, SIKUKI Nuuk Harbour A/S pillugu inatsisartut inatsisissaattut siunnersuut pillugu nassuiaatitaani allaqqasut tulliuuttunut tunngasut:*

*”Pilersaarusiordermi nuna tamakkerlugu malitassani Nuummi umiarsualivimmik nutaamik sananissamat aalajangersakkat erseqqinnerusut akuerinissaannut Naalakkersuisut piginnaatinneqarput. Pilersaarusiordermi nuna tamakkerlugu malitassat siunnersuummut matumunnga tapertaassapput, peqatigisaanillu tamatuma kingunerisaanik Kommuneqarfik Sermersooq kommunimut pilersaarummut tapiliussamik suliaqassanngilaq.”* kiisalu

*”Pilersaarusiordermi nuna tamakkerlugu malitassat suliarineqarnerat aamma siunnersuummi § 7 (inatsisissatut siunnersuutip nassuiaatitaata kalaallisoortaanit inatsisissatut siunnersuummut innersuussut § 7-iummat kukkuneruvoq) naapertorlugu maleruagassanik aalajangersaaneq, suliaassamat siunnersuut SIKUKI Nuuk Harbour A/S-imit suliarineqartoq tunngavigalugu pisinnaassasoq naatsorsuutigineqarpoq.”*

*Kommuneqarfik Sermersuup tungaaniit isiginnittaaseq naapertorlugu inatsisissatut siunnersuut tassungalu nassuiaatit imminnut naapertuuttariaqaralarput. Naalakkersuisut pilersaarusiordermi nuna tamakkerlugu malitassaliorniarunik, taamaalillunilu Kommuneqarfik Sermersooq kommunimut pilersaarummut tapiliussaliorneq unitsikkallartariaqassappagu, tamanna inatsisissatut siunnersuummi allaqqasariaqarpoq, aamma § 8-mi allaqqanera -sinnaavaat imaalillugu -rusuppaat allannortittariaqaralarluni.*

*Inatsisissatut siunnersuut tassungalu nassuiaat imatut paasisariaqassappata, tunngaviatigut pilersaarutaasut SIKUKI Nuuk Harbourip umiarsualiviliornissaani kommunimi pilersaarummut tapiliussaqaq naatsorsuutigineqarluni, aammalu kommunimut pilersaarummut tapiliussaqaq periarfissaanngitsoorneratigut pilersaarusiordermi nuna tamakkerlugu malitassaqaq periarfissatut isigineqassasoq, taava inatsisissatut siunnersuummut nassuiaat paasinarnerusunngorlugu iluarsineqartariaqarpoq.*

*Politikkikkut eqqartuinermit allannguuteqartoqarsinnaanera piareersimaffigeqquneqassaaq.”*

Akissut

Siunnersuummi § 8-imi Naalackersuisut nuna tamakkerlugu pilersaarusionermut maleruagassani Nuummi umiarsualivimmik nunami sanaartugartaqartumik illuutitaqartumillu nutaamik sanaartornissamut aalajangersakkanik erseqqinnerusunik akuersinissamut piginnaatinneqarput. Siunnersuummi erseqqissarneqarpoq piginnaatitsissuteqarnermi kommunip pilersaarutaanik tunngavissaqannginnerup imaluunniit taassuma naammanginnerata malitsigisaanik suliasami kinguaattoornissaq pinngitsoortinniarlugu Naalackersuisut periarfissaqartinneqartut. Taamaattoq Kommuneqarfik Sermersuup naatsorsuutigaa kommunimut pilersaarummut tapiliussa q suliasap ilusilersorneqarnera atorlugu piviusunngortinnissaanut periarfissiisumik suliaqassalluni akuersissallunilu.

Kalaallit Nunaanni Sulisitsisut Peqatigiiffiat

*”Kalaallit Nunaanni Sulisitsisut Peqatigiiffiata aallarniutigalugu GA-p tusarniaanermut akissuteqaataa 6. januar 2014-imeersoq innersuussutigissavaa (assilinera ilanngunneqarpoq).*

*Tamatuma saniatigut GA siunnersuummut nalinginnaasumik oqaaseqaatissaqanngilaq.*

*GA aalajangersakkanut ataasiakkaanut makkuninnga oqaaseqaatissaqarpoq:*

*§ 9 pillugu*

*Aalajangersakkami allassimavoq Naalackersuisut Nuummi umiarsualiviup nutaap nunami sanaartugartaqartup illuutitaqartullu neqeroortitsivigineqarnissaa pillugu maleruagassanik aalajangersaasinnaasut.*

*GA-p naatsorsuutigaa siunertaasoq nunaqavissunik pilersuisussanik atuinissaq pillugu aammalu najukkami suliffissanik ilinniarnermilu sungiusarfissanik qulakkeerinissaq pillugu maleruagassat aalajangersarneqarsinnaassasut. Aalajangersagaq ammanerusumik oqaasertalersugaavoq neqeroortitsisarnermut inatsisip saneqqunneqarnissaa siunertaanersoq nalorninartitsisumik.*

*GA-p inassutigissavaa aalajangersakkami erseqqissumik nassuiarneqassasoq neqeroortitsisarnermut inatsit atuuttoq. Kisianni neqeroortitsisarnermut inatsimmi aalajangersakkat saniatigut nunaqavissunik pilersuisoqassasoq aammalu najukkami suliffissanik ilinniarnermilu sungiusarfissanik qulakkeerisunik aalajangersakkanik aalajangersaasoqarsinnaasoq maleruagassanik aalajangersaasoqarsinnaassasoq.*

*Kalaallit Nunaanni Sulisitsisut Peqatigiiffiat allanik oqaaseqaatissaqanngilaq”*

## Akissut

Kalaallit Nunaanni Sulisitsisut Peqatigiiffiata tusarniaanermut akissuteqaataa 6. januar 2014-imersoq umiarsualiviit pillugit Inatsisartut inatsisissaattut siunnersuummut tunngassuteqarpoq. Tusarniaanermut akissuteqaat umiarsualiviit pillugit Inatsisartut inatsisissaattut siunnersuummi sammineqarpoq.

Siunnersuummi § 9 siunnersuummi matumani peerneqarpoq.

SIKUKI Nuuk Harbour A/S illuliortiternermut sanaartornermullu suliaasaqarfimmi neqeroorteqartitsisarneq pillugu Inatsisartut inatsisaat naapertorlugu umiarsualivimmum nunami sanaartugartaqartumut illuutitaqartumullu neqeroortitsinermik ingerlatsisissaaq. Taassuma sinaakkutissaasa iluanni najukkami suliffissanik aamma ilinniarnermi sungiusarfissanik kiisalu sanaartornerup immikkoortuani nunaqavissunik pilersuisuusussanik atuinissamik qulakkeerinissaq isumagineqarsinnaavoq. Tamanna matumap siuliani saniatigut suliami allaatigineqartut isumagineqarsimavoq, tassa kalaallit sulisorineqarneratigut unammilliutaasinnaangortillugu, aamma taamatut kalaallit sulisorineqarnissaat qulakkeerneqassalluni.

## SIK

*Maannakkut aningaasaqarnikkut ingerlanerliornerup nalaani annertoorsuarmik sanaartornermik suliasamik aallartitsisoqassammat naammagisimaarnartorujussuuvoq. S.I.K.-mut erseqqissassallugu pingaaruteqarpoq, tamanna suliffissanik aamma ilinniartunik ilinniartitsinermik ilaqartumik inuiaqatigiit aningaasaqarnerannut iluaqutaasumik najukkani suliffissarpassuarnik aammalu najukkani suliffeqarfinnik nukittorsaanermik malitseqartariaqartoq.*

*Inatsimmut nassuiaatini nalinginnaasuni allassimavoq inuiaqatigiit aningaasaqarneranni nalilersueqqissaartoqarluni peqqissaartumik piareersartoqarsimasoq. Taamaattumik eqqumiiginarpoq inuiaqatigiit aningaasaqarneranni ilaasut suliffissanut ilinniartunullu sungiusarfissanut tunngassuteqartut pingaaruteqartut taakkorpiaat, neqeroortitsisarnermut maleruagassanit atuuttunit aammalu ilinniartunut sungiusarfissanik pilersitsinissamut pisussaaffeqarnermik ilaatitsinngitsoqarsinnaanera inatsimmi siunnerfigineqarmat.*

*Siunnersuummi § 9-imi allassimavoq Naalakkersuisut Nuummi umiarsualivimmik nutaamik nunami sanaartugartaqartumik illuutitaqartumillu sananissamut neqeroortitsinermut maleruagassanik aalajangersaasinnaasut, tassani ilaallutik nunaqavissunik pilersuisuusussanik atuinissaq aamma najukkami suliffissanik aamma ilinniartunut sungiusarfissanik qulakkeerinissaq pillugit.*

*Tamannalu tusarnerpoq, maleruagassat taamaattut maleruagassani marlunni pigineqareersut eqqaassanngikkaanni:*

*Toqqaannanngitsumik illuliortiternermut sanaartornermillu suliaasaqarfimmi neqerooruteqartitsisarneq pillugu Inatsisartut inatsisaat nr. 11, 2. december 2009-imeersumi. Inatsit neqerooruteqartitsinermut aammalu ilaatigut ingerlatseqatigiiffinnut Namminersorlutik Oqartussat aalajangiisuusumik sunniuteqarfigisaannut illuliornermik sanaartornermillu suliaqarnissamut suliaakkiissuteqartarnermut atuuppoq.*

*Inatsimmi tassani § 15 naapertorlugu ilaatigut suliaakkiissut tunngavissarititaasut assigiinngitsut isumaqatigiissutissaq pineqartoq malillugu allanngorartut eqqarsaatigalugit aningaasaqarnikkut iluaqusiinerpaasussamik neqerooruteqarneq tunngavigalugu suliaakkiissutigineqarsinnaavoq. Tunngavissarititaasut allattorsimaffeqarput tamakkiisuunngitsumik. SIKUKI Nuuk Harbour A/S pillugu Inatsisartut inatsisaanni inuiaqatigiinni aningaasaqarnikkut iluaqusiisumik sunniinerit annertuumik pingaartinneqarmata, soorunami aamma neqeroortitsinermut atatillugu najukkami suliffissanik pilersitsinissaq pingaartinneqarsinnaassaaq, taamaaliornikkut inuiaqatigiit isumagininnikkut ikiorsiissutinik sipaagaqassammata aammalu akileraarutitigut isertitat annertunerulissallutik.*

*Inatsimmi tassani § 35-imi aalajangersagaqarpoq, illuliornermik sanaartornermillu suliaqarnermut inatsimmi pineqartunut ilaasumut atatillugu qanoq annertutigisumik ilinniartunik tigusisoqarsinnaassanersoq maleruagassanik Naalakkersuisut aalajangersaasinnaasut. Inatsisitigut tunngavissaq taanna sanaartornermi ilinniartoqartarneq pillugu Namminersorlutik Oqartussat nalunaarutaat nr. 10, 12. juli 2010-imeersumi atornerqarpoq, tassani § 2-imi neqeroortitsinermut najoqqutassani suliaasap nalinganut naleqqiullugu ilinniartunik minnerpaamik qassinik atorfinitsitsisoqassanersoq piumasagaateqartoqassasoq neqerooruteqartumut piumasagaatit aalajangersarneqarput.*

*Tamanna tunngavigalugu siunnersuummi § 9-imut nassuiaatit soqutiginaateqartorujussuupput, tassami nassuiaatini aalajangersarneqarpoq;*

*”Qanoq annertutigisumik atugassarititaasut pilersuisunik nunaqavissunik atuinissamik, nunaqavissunik sulisoqarnissamik aammalu ilinniartunut sungiusarfissanik pilersitsinissamut isumaqatigiissuteqartoqarnissaanik qulakkeerisussat tunngavigalugit neqeroortitsisoqassanersoq, aningaasaqarnikkut aningaasartuutissanik taakkununnga atasunik ataatsimoortumik naliliinissaq apeqqutaassaaq. Taamaattumik atugassarititaasunut taamaattunut aningaasaqarnikkut aningaasartuutaanerusussaasinnaasut missiliorlugit naliliisoqartussaassaaq.”*

*Imaluunniit allatut oqaatigalugu: Atugassarititaasut neqeroortitsinernut tamaginnut atuukkaluartut, SIKUKI Nuuk Harbour A/S-imut atuuttariaqanngillat.*

*Taamaattoqarnerani iluaqutissartaasut sulisussat nunaqavissut, najukkami suliffeqarfiiit kommunillu annaasassaat eqqaassanngikkaanni, tamanna IBA-mut*

*isumaqatiginninniarnernut siunissami suliniutinut angisuunut atatillugu ingerlanneqartartussanut kalerrisaarineruvoq isumaliornartortaqartoq, tassani pisortat annertoorujussuarmik nassuiaanissamik ajornartorsiuteqalersinnaallutik.*

*S.I.K.-mit siunnersuutigineqarpoq § 9 siunnersuummit peerneqassasoq imaluunniit taamaattoqassanngippat nassuiaatini allanneqassasoq aningaasaqarnikkut aningaasartuutaaneruinnaasunik nalilersuinermi inuiaqatigiit aningaasaqarneranni iluaqutaasumik sunniutaasussanik nalilersuinikkut illuatungiliinermik ILAATITSISOQASSASOQ.*

Akissut

Siunnersuummi § 9 peerneqarpoq.

SIKUKI Nuuk Harbour A/S illuliortiternermut sanaartornermullu suliaasaqarfimmi neqeroorteqartitsisarneq pillugu Inatsisartut inatsisaat naapertorlugu umiarsualivimmut nunami sanaartugartaqartumut illuutitaqartumullu neqeroortitsinermik ingerlatsissaaq. Taassuma sinaakkutissaasa iluanni najukkami suliffissanik aamma ilinniarnermi sungiusarfissanik kiisalu sanaartornerup immikkoortuani nunaqavissunik pilersuisuusussanik atuinissamik qulakkeerinissaq isumagineqarsinnaavoq. Siuliani allaaserineqartutut tamanna qulakkeerniarneqarsimavoq, sulisartunik kalaallinik atuinissap suliarinnittussarsiuussilluni unammisitsinerni tunngavissanut ilaatinneqarneratigut, taamaasillunilu sulisartut kalaallit sulisorineqarnissaat qulakkeerneqarluni.

Qeqqata Kommunia

*”SIKUKI Nuuk Harbour A/S-ip pilersinneqarnissaa sanaartorneqarnissaalu pillugit inatsisartut inatsisissaattut siunnersuut tusarniutigalugu, Namminersorlutik Oqartussani siulittaasup naalakkersuisoqarfiata nassiuppaa. Tusarniummut kingusinnerpaamik akissuteqarnissaq 2014-imi februaarip 12-iani ullulerneqarpoq.*

*Qeqqata Kommunia isumaqarpoq, siunnersuut illoqarfimmut ataasiinnarmut, nunatsinni illoqarfiit pingaarnersaannut, iluaqutaalluni nunap sinneranut sunniutissai pitsaassanngitsut.*

*Inatsisissatut siunnersuut eqqunngitsunik paasisutissaqalersillugu, nassuiaatit eqqunngitsunik paasisutissaqarnerat iluarnerunngivippoq.*

*1. Aallaqqaasiullugu nassuiaatini paasisutissiissutigineqarpoq, Assartuussineq pillugu isumalioqatigiissitaq ”Nuup umiarsualiviani siunissami assartukkat annertusiartornissaat pillugu mianersortumik eqqoriaasimasoq”.*

*Oqaatigineqartoq eqqoqqissaanngilaq, imaammat:*

- a. Assartukkat ukiumut qaffariaatissaattut Assartuussineq pillugu isumalioqatigiissitap 2,6 procenti aallaavigimmagu*
- b. Ukiuni kingullerni assartukkat appariaateqarput, takuuk RALip naatsorsuutai*

- c. *Naalackersuisut siulittaasuat Aleqa Hammond-ip Inatsisartut sanaartornermut ataatsimiititaliaannut 2013-imi novembarip aallaqqaataani allakkamini paasissutissiisutigaa, "Assartuussineq pillugu isumalioqatigiissitap misissuinermini, assartukkat 2,6 procentinik qaffariaateqarnissaat aallaavigaat. Qaffariaat taanna kingullertigut misissuinermini (Inuiaqatigiissut kingunerisinnaasaannik misissuinermini aamma malittarisassani) 1,5 procentinut iluarsiiiffigineqarpoq"*
- d. *d)Naalackersuisoq Steen Lyngge, Qeqqata Kommunanut novembarip arfineq-pingajuanni allagaqarnermini taamatorluinnaq paasissutissiivoq.*

*Assartuussineq pillugu isumalioqatigiissitap assartukkat qaffariaateqarnissaannut nalilersuinissaminni annertuallaamik naatsorsuisimanerat pillugu Naalackersuisunut ilaasortat 2013-imi novembarimi paasissutissilluarneqarsimagunarput. taamakkaluartoq maanna Namminersorlutik Oqartussat nassuiaatiminni allapput, Assartuussineq pillugu isumalioqatigiissitap naliliineri mianersortumik naliliinerusimasut.*

*Tamanna paatsuunganarpoq – uukapaatitsinermut qanissinnaavorluunniit.*

- 2. *Aningaasaqarnikkut kingunerisinnaasai pillugit nassuiaatip kapitali 3-ani 'Ataavartumik ingerlatsinissap aningaasalersorneqarnissaa'-ni oqaatigineqarpoq, "ullutsinni akilerneqartussaannigitsunik sulianit isertitaqalerumaartoq, soorluttaaq pingaartumik aatsitassarsiornermut atatillugu sulianit nutaanit isertitaqalerumaartoq."*

*Oqaatigineqartoq paatsuunganarpoq, imaammat:*

- a. *Inuussutissarsiornermut, Aatsitassaqaarnermut Suliffeqaarnermullu Naalackersuisoqarfiup 2013-imi septembarip pingajuani tusarniummut akissuteqaatimini erseqqissaatigimmagu, "aatsitassarsiornermik suliaqarlutik suliffeqarfiit aalajangersimasumik assartuisarnissaannut umiarsualivik killiliinanilu pituttuissannigisoq.*
- b. *b)Inuussutissarsiornermut, Aatsitassaqaarnermut Suliffeqaarnermullu Naalackersuisoqarfiup tusarniummut akissuteqaatimini aamma erseqqissaatigaa, "Nuummi nutaamik umiarsualivittaarnissami Nunatta iluani nalinginnaasumik assartuussineq aalisakkanillu avammut nioqquteqarneq pingaarnertut tunngaviuput".*
- c. *c)Inuussutissarsiornermut, Aatsitassaqaarnermut Suliffeqaarnermullu Naalackersuisoqarfiup 2014-imi januaarip 11-ani sanaartorneq pillugu isumasioqatigiinnermi saqqummiuppa, "Taamaattumik umiarsuit angissusaannut il.il. eqqarsaatigalugit angissutsitigut pisariaqartitavinnut naapertuuttumik pīaasut pīaavimmi eqqaani nutaamik talittarfiliortassapput. Umiarsuit 180-250 meterinik takitigisut pīaavinnit assartuutitut atorneqartassasut naatsorsuutigineqarpoq. Imaappoq, umiarsuit talissinnaassappata talittarfīit minnerpaamik 15-20 meterinik itissuseqassapput. Taamaattumik umiarsuit taakku umiarsualivinnut piusunut talissinnaanngillat."*
- d. *Nunatsinni pīaaviit ukiuni kingullerni umiarsualivinnik piusunik atuinikuunngillat.*

*Pīaaviit illoqarfiup qanitarisaanniinngippata, pīaasut illoqarfīit umiarsualiviinik atuinaviannigitsut Namminersorlutik Oqartussat ilisimaarilluarsimagunarpaat.*

*Taamaakkaluartoq maanna Namminersorlutik Oqartussat nassuiaatiminni allappaat, aatsitassarsiortunit Nuup Umiarsualivia isaatitsissasoq. Isertitassat taakku isertinneqanngipata, Nunatsinni innuttaasut inuussutissarsiorfiillu assartuussinermi qaffasissumik akiliuteqartassapput.*

*Tamanna paatsuunganarpoq – uukapaatitsinermut qanissinnaavorluunniit.*

3. *Aningaasaqarnikkut kingunerisinnaasai eqqartorneqartillugit pissutsit allat ilanngunneqanngillat, soorlu:*
  - a. *Aalborg-ip Nuullu akornanni assartuisartussanik sukkanerusunik nutaanik marlunnik pisinissami aningaasartuutissat*
  - b. *Maannamut assartorneqartartut assigalugit siunissami umiarsuarnik anginerusunik ulikkaaqqanngitsunik assartuisalernissami aningaasartuutissat (umiarsuarnik anginerusunik ingerlatsineq akisunerunngitsoornaviannigilaq)*
  - c. *Ilulissat-Nuuk-Nanortallip akornanni ullumikkut ataasiinnaq sinersortarneranut sanilliullugu umiarsuit marluk sinersortinneqarnissaanni aningaasartuutissat*
  - d. *d) Nuummi pisortat aningaasaliinerinut allanut ataqatigiinnissaani suliassaqaangaatsialernermi naatsorsuutiginngisamik sanaartornissami aningaasartuutissat annertunerungaatsiarsinnaaneri, pingaartumik inissialiortiterneq pineqaatissinneqarsimasunullu isertitsiviliorneq (takuuk Aleqa Hammond-ip Inatsisartut sanaartornermut ataatsimiititaliaannut 2013-imi novembarip aallaqqaataani allakkiaa naapertorlugu ataqatigiissaarneqarsimanngitsoq, avataaniillu sulisoqartariaqarnissamik pisari-aqalersitsisoq)*
  - e. *e) Siunniunneqartumik taamak annertutigisumik qitiusunngortitsiniarnermi nunap immikkoortortaannut kingunerisinnaasai, pingaartumik Aasiaat (Sisimiullu) eqqarsaatigalugit appariartitsissaaq.*
  - f. *f) RAL-ip SIKUKIllu suliassaataannik ajoraluartumik akulerussuineq, matumani naak paasissutissiissutigineqartut akerliata tungaanut paasissutissiissutigineqaraluartut iliuuseqarnissami illuatungeriit kisermaassisuugaluartut imminnut pinngitsoortissinnaajunnaarsinneqarput. Aaqqissuussineq umiarsuarnik assartuinnermi aaqqissuussiinnermut ukiorpassuarni parnaarisussaq, kinguneqarluartumillu unammilleqatigiinnermut akornutaasussaq.*

*Assigiinnigitsutigut aningaasartuutissat taakku Namminersorlutik Oqartussat ilanngusimannigilaat, tamatumalu kingunerisaanik kingumut Nunatsinni innuttaasut inuutissarsiorfiillu assartuussinermi qaffasissumik akiliuteqartassapput*

*Tamanna paatsuunganarpoq – uukapaatitsinermut qanissinnaavorluunniit.*

*Tamatuma saniatigut paasissutissanut atorneqarsimasunut Qeqqata Kommunia qularnikuuvoq, takuuk 2013-imi septembarip aappaani tusarniummut akissuteqaaterput. Tamatuma saniatigut umiarsuarnut atatillugu Namminersorlutik Oqartussat paasissutissaataanut avammut nioqquutissiortartut nunamullu eqquussisartut tatiginninnissaminnut patsisissaqanngitsut, Namminersorlutik Oqartussallu paasissutissanik eqqunngitsunik tunuartitsisariaqarsimanagera maluginiarparput.*

*Umiarsuarnik assartuinermi tunngaviusumik paasissutissanik amigaateqaraluartoq, pilersaarummut taamak annertutigisumut akisutigisumullu Namminersorlutik Oqartussat paasissutissanik suli atuiniarnera Qeqqata Kommuniata annertuumik ernumanartoqartippaa.*

*Tamanna tunualiaqutaralugu inatsisissatut siunnersuut tunuartinneqarluni, umiarsualivinni assartuinermilu pissutsinik arlaannaannulluunniit attuumassuteqanngitsumik misissueqqissaartoqassasoq Qeqqata Kommuniata kajumissaarutigissavaa. Nunatsinni ataqatigiissitsinissami kikkut tamat paasissutissanik paasinninnissaat isumaqataanissaallu, Nuummilu selskabit kisiisa aallaaviginagit nunap immikkoortortai suliamut tamatumunnga peqataatinneqarnissaat qitiuvoq.”*

Akissut

*Ataatsimut isigalugu*

Inatsisartut Nuummi umiarsualivimmik nutaamik pilersitsinissaq pillugu aalajangeereerput. SIKUKI Nuuk Harbour A/S aamma Nuummi umiarsualiviliornissaq pillugu Inatsisartut inatsisissaattut siunnersuut manna Inatsisartut aalajangiinerannut malitseqartitsilluni saqqummiunneqarpoq.

Inatsisartut UKA 2013/18-imi ”Nuummi umiarsualivittaassap sanaartorneqarnissaanut ingerlanneqarnissaanillu siunertaqartumik aktiaateqarluni ingerlatsivimmik pilersitsisoqarnissaanik kingusinnerpaamillu UPA2014-imi ingerlatsiviup umiarsualiviullu pissutsinut nalimmassarneqarnissaa pillugit Naalackersuisut 2013–imi suliakkerneqarnissaat pillugu Inatsisartut aalajangiiffigisassaattut siunnersuut.” suliaraat.

Inatsisartut Sanaartornermut ataatsimiititaliaa siunnersuummut ulloq 23. november 2013 isumaliutissiissuteqarpoq. Inatsisartut Sanaartornermut ataatsimiititaliaata siunnersuut akuerineqassasoq isumaqatigiissutigalugu inassutigaa.

Inatsisartut ulloq 27. november 2013 aalajangiiffigisassatut siunnersuut akueraat.

Qeqqata Kommunianit apeqquterpassuit aalajangiiffigisassatut siunnersuutip Inatsisartuni suliarineqarneranut akuerineqarneranullu ilaatillugu suliarineqarput. Tassani Sanaartornermut Ataatsimiititaliap isumaliutissiissutaa 25. november 2013-imeersoq ilanngussartaqartoq ilanngullugillu ilanngussaq 5, ilanngussaq 10, ilanngussaq 11 aamma 12 innersuussutigineqarput.

Naalackersuisut naliliinngillat Nuummi umiarsualivimmik nutaamik sananissamik Inatsisartut aalajangiinerannut paasissutissat tunngaviusut kukkuneqartut. Naalackersuisut naliliinngillat Assartuussineq pillugu Isumalioqatigiissitap inassuteqaatai Nuummi umiarsualivimmik nutaamik pilersitsinissamut sioqqutsisumik salliutitsiniarnermik sunnerneqarsimasut.



Naalakkersuisut Qeqqata Kommuniata paasinninneranut isumaqataannigillat, nassuiaatit ”tamanna paatsuunganarpoq – uukapaatitsinermut qanissinnaavorluunniif”.

*Siunissami usit annertussusaasa ineriartornissaat*

Assartorneqartut annertussusaasa ineriartornissaat naatsorsuutigineqartoq ingerlaavartumik nalilersuiffigineqartarpoq aammalu UKA 2013/18-ip Sanaartornermut Ataatsimiititaliami suliarineqarnerani ilaatinneqarluni. Assartuussineq pillugu Isumalioqatigiissitap 2,6 %-imik amerlinissaat naatsorsuutigaa. Kingusinnerusukkut naatsorsuutigisat annikillipput taamaalillunilu assartuussinermut akiusut 1,5 %-imik qaffannissaat maannakkut tunngaviusut malillugit naatsorsuutigineqarluni. Pilersaarummut, ingerlatseqatigiiffimmut tamatumalu kingorna ingerlatsinissamut atatillugu SIKUKI Nuuk Harbour A/S-ip aningaasatigut tunngavissani assartortakkat 0,41%-imik qaffariarnissaat mianersortumik ilanngullugit suliarisimavai.

Naalakkersuisut UKA 2013/18-mut ataatsimiititaliap isumaliutissiissutaanut ilanngussaq 10-imi aammalu Qeqqata Kommuniata apeqquteqarnerani imatut allapput:

*”Eqqorpoq usit annertussusii 2,6 %-imik ineriartortillugit Assartuussineq pillugu Ataatsimiititaliarsuaq misissuinermini tunngaveqarmat. Ineriartorneq taanna misissuinerne kingullerni (inuiaqatigiit akiliisinnaassusianik nalilersuineq aamma suleriaasissamut pilersaarut) 1,5 %-imut iluarsineqarpoq takutillugu suli imminut akilersinnaassasoq”*

Matuma siuliani – SIKUKI Nuuk Harbour A/S aamma Nuummi umiarsualiviliornissaq pillugu Inatsisartut inatsisissaattut siunnersuut immikkoortoq 1. Aallaqqaasiut – Nuummi umiarsualivimmik nutaamik pilersitsinissaq pillugu Assartuussineq pillugu Isumalioqatigiissitap inassuteqaataannit tigulaagaq ilanngunneqarpoq taamatullu ”Inuiaqatigiit aningaasaqarnerannut sunniutaasussanik naliliineq – Nuummi umiarsualiviup allilerneqarnera”-nit eqikkaaneq UKA 2013/18-ip Inatsisartuni suliarineqarneranut akuerineqarneranullu tunngaviusunut ilaasoq innersuussutigineqarluni.

Assartuussineq pillugu Isumalioqatigiissitap inassuteqaataanni ilaatigut allassimavoq:

*”Nassuiaatigineqareersutut taamatut inerneqarnissaa aamma isumannaatsorujussuussaaq. Pingaartumik Imapik ikaarlugu assartuussinermut atatillugu aningaasartuutitigut sipaarneqarsinnaasunut mianersortumik missiliuisoqaraluartoq, aammalu Nuummi umiarsualivimmi siunissami nassiussat amerlassutsimikkut ineriartornissaat mianersortumik missiliorneqaraluartut, naatsorsuinerit ingerlanneqartut takutippaat, Umiarsualiup qeqertaanni umiarsualivik containerersorfiusussaq nutaaq inuiaqatigiit aningaasaqarneranni annertuumik iluanaaruteqarfiussasoq. Aamma taamatut inerniliineq malussajassutsimut naatsorsuinerne ingerlanneqartuni allannagortinneqanngilaq, naak Umiarsualiup qeqertaanni*

---

annikillisinnegaraluartoq.”

Naalakkersuisut UKA 2013/18-imut ataatsimiititaliap isumaliutissiissutaanut ilanngussaq 10-imi aammalu Qeqqata Kommuniata apeqquteqarneranut suliassap patajaassusaanut tunngatillugu imatut allapput:

*”Qeqqata Kommuniata oqaatigaa Nuup Umiarsualivia pillugu missingiutip Assartuussineq pillugu Ataatsimiititaliarsuup naatsorsorsimasaanit annertunerujussuummat, tamannalu tunuliaqutaralugu pilersaarutip imminut akilersinnaanera qularutigalugu. Pilersaarummi maannakkut suliarineqartumi pissutsit assingi Assartuussineq pillugu Ataatsimiititaliarsuup misissuineranut ilaangillat. Assersuutigalugu allaffeqarfiiit kranillu ilaangillat. Aammattaaq ilanngunneqassalluni pilersaarut Assartuussineq pillugu Ataatsimiititaliarsuup pingaarnertigut inuiaqatigiinnut akilersinnaassuseqarneranut misissueqqissaarnermik tunngaveqarunnaarmat ilanngussaq 1, akerlianilli Namminersorlutik Oqartussat peqataaffigisaanni pilersaarutitut anginerusunut nalinginnaasumik najoqqutassiat 2013-imi maajimi suliarineqartut tunuliaqutaralugit inuiaqatigiinnut akilersinnaassusermik nalilersuisoqarluni, soorlu aamma suleriaasissamik nutaamik piareersaasoqartoq. Misissueqqissaarnerit marluk taakku takutippaat suliniut suli aningaasaqarnikkut tunngavissaqarluartoq.*

*Qeqqata Kommunianiit Assartuussineq pillugu Ataatsimiititaliarsuup siulittaasuanut Christen Sørensenimut allakkat ammasut suli imminut akilersinnaassutsimut tatiginninnersoq aperineqarnera tunuliaqutaralugu ulloq oktobarip aappaani nalunaarpoq pilersaarutip tutsuiginartuuneranik suli naliliilluni. Imatut inerniliivoq:*

*”Inuttut naliliinera tassaavoq Assartuussineq pillugu Isumalioqatigiissitap misissorneqartoq Nuummi umiarsualiviup allineqarsinnaanera aningaasaliinissamut pilersaarutini annertunerusuni naammasineqarnissaanut qularnaannerpaat imminullu akilersinnaanerpaat ilagimmassuk.”*

*Ingerlaavartumik ingerlatsinermut aningaasalersuineq*

Nuummi umiarsualiviliornissaq Kalaallit Nunaannut, Kalaallit Nunaannit aamma Kalaallit Nunaanni usinik imaatigut angallasserup, ingerlasussanik pilersaaruserup passussinerullu pitsanngorsarneqarnissaanut ilaatillugu pissaaq. Nuummi nutaamik umiarsualiviorneq illoqarfinni nunaqarfinnilu usinik pilersuinerup ataatsimoortumik aaqiissutissamut ilaatillugu pissaaq. Nuummi nutaamik umiarsualiviornermi pingaartumik Kalaallit Nunaata kujataani aamma kitaani aatsitassanik misissuinerup ingerlatanut inissiinermi inissaqartitsinermik pilersitsinissamut periarfissaqartitsisoqalissaaq.

Inuussutissarsiornermut, Aatsitassaqaarnermut Suliffeqaarnermullu Naalakkersuisoqarfiup tusarniaanermut akissuteqaataa 3. september 2013-imeersoq Inatsisartut UKA 2013/18-imik suliarinninnerannut ilaavoq. Nuummi nutaamik umiarsualiviliorneq siunissami aatsitassarsiorfissaasinnaasut sullinneqarnissaat siunertaralugu pissanngilaq. Aatsitassarsiorfiit taamaattut immikkut umiarsualiveqarfinnik aatsitassarsiornermik suliassamut aalajangersimasumut ilusilersorneqartumik pilersitsisassasut naatsorsuutigineqarpoq.

SIKUKI Nuuk Harbour A/S-imut ingerlatsinissamut pilersaarummi ingerlatseqatigiiffiup isertitassanut tunngavissai pingaarnerit Royal Arctic Line A/S-imit attartornermut isertitaneersuusussaapput. Isertitassat annikinnerusut uuliasiornerup aatsitassarsiornerullu iluanni misissuineramik ingerlatanut tutsinneqarsinnaasut missingersorneqarput. Ingerlatsinissamut pilersaarummi uuliasiornermik aatsitassarsiornermillu suliaqartut annertusarneqarnerannit annertuumik sunniutaasussat ilanngunneqanngillat. Sunniutaasussat taakkua qaffatsitsisinnaasutut isigineqarput.

*Aningaasaqarnikkut sunniutaasussat*

*Ataatsimut isigalugu*

SIKUKI Nuuk Harbour A/S-ip pilersinneqarnissaanik aamma Nuummi umiarsualivimmik nutaamik sanaartornissamik siunnersuut taannaanaq isigalugu ingerlatseqatigiiffimmut aamma Namminersorlutik Oqartussanut, Nunap karsianut ingerlatsinikkut sunniuteqassaaq. Aningaasaqarnikkut sunniutaasussat naatsorsuutigisallu taakkua siunnersuummi matumani nassuiarneqarput.

Nuummi nutaamik umiarsualiviliorneermi sunniutaasussanut taakkunungalu malittaasumik sunniutaasussanut tunngaviusut UKA 2013/18-imut ilaatillugit suliaaraat. Sanaartornermut Ataatsimiititaliap isumaliutissiissutaa 25. november 2013-imeersoq ilanngussartaqartoq, ilanngullugu ilanngussaq 8 (apeqqutinut 7 – 9-inut akissut) innersuussutigineqarpoq.

*Royal Arctic Line A/S-ip umiarsuaatiminnut periusissaa*

Rambøll Management Consulting-ip Aningaasaqarnermut Nunamullu Namminermit Naalakkersuisoqarfik sinnerlugu ”Inuiaqatigiit aningaasaqarnerannut sunniutaasussanik naliliineq – Nuummi umiarsualiviup allilerneqarnera” 17. maj 2013 ullulerneqartoq suliaaraa. Royal Arctic Line A/S-ip umiarsuaatiminut periusissaa aammalu imm. 2.1-imi Aningaasaliinerit annertunerusut, sipaarutissat piviusunngortinneqarnissaat pillugu allassimavoq:

*”Nutaamik umiarsualiviliorneermi iluanaarutissat pissarsiariniarlugit RAL-ip maannakkut umiarsuaatiminut periusissaata pitsaanerulersinneqarnissaa pisariaqarpoq. Tassani*

*umiarsuit imarpikkoortaatit pingasut maannakkut ator neqartut kraaninik atortutaqartut, umiarsuarnik angisuunik marlunnik (1000-1200 TEU) kraanimik atortoqanngitsunik taarserneqarnissaat pisariaqarpoq. Umiarsuit nutaat pisiarinerisigut (nutaamik sanaartorneq) imaluunniit attartornerisigut pissarsiarineqarsinnaapput. Pisinissap imaluunniit attartornissap akornanni toqqaaneq RAL-imi ingerlaavartumik ingerlatsinermut aammalu inuiaqatigiinni akiitsut ataatsimut katillugit ineriartorsinnaanerannut pingaaruteqarpoq.*


*Aalajangiinissaq taanna misissueqqissaarnermi matumani ilaatinneqanngilaq, pissutigalugu*

- 1. RAL qanoq pisoqaraluarpalluunniit umiarsuit taakkua 2017-imi atorunnaarneqartussatut naatsorsuutigineqartut qanoq pitsaanerpaamik taarserneqarsinnaanersut aalajangiisussaammat*
- 2. aalajangiinissaq umiarsualivimmut nutaamut aningaasaliinissaq pillugu aalajangiinissamut tunngatillugu imminut akilersinnaaneranut aalajangiisuusussaangilaq. Pisineq aamma attartorneq tamarmik sipaaruteqarfiussapput assersuutigalugu 2 x 1200 TEU-imi attartortoqassappat misissueqqissaarnermi matumani ukiumut 30 mio. kr. sipaarneqartassatut ilimagineqarpoq. Aalajangiineq nutaamik umiarsualiveqalernerata qanoq iliorluni pitsaanerpaamik atorluarneqarsinnaaneranut annertuumik tunngassuteqarpoq*
- 3. siunissami umiarsuarnik attartornermut pisinermullu niuerfik nalilersoruminaappoq. Misissueqqissaarneq annertooujussuarnik nalorninartortaqartussaavoq aammalu paasisat aalajangiinermut tunngavissatut naleqqutissanatik*

*Matuma siuliani allassimasut tunngavigalugit naliliisoqarpoq, siunissami umiarsuaatinut periusissaq pillugu aalajangiisoqarnissaa sioqqullugu nutaamik umiarsualiviliornissaq pillugu aalajangiisoqarsinnaasoq. Umiarsuaatinut periusissiami aningaasaliinissamut pisariaqartitsinerusinnaasut pissutigalugit inassutigineqarpoq, umiarsuarnik nutaanik pisinissaq imaluunniit attartornissaq pillugu aalajangiisoqannginnerani "Inuiaqatigiit aningaasaqarneranni sunniutaasussanik nalilersuinernik suliaqartarnerni ilitersuut"-imi malittarisassat malillugit inuiaqatigiit aningaasaqarneranni sunniutaasussanik nalilersuinernik suliaqartoqassasoq.*

*Matuma kinguliani pisinissamut imaluunniit attartornissamut periarfissatut ilusiliat assigiinngitsut qanoq assartuussinermut akit qaffannissaannik pisariaqartitsinermut sunniinissaat naatsorsuutigineqarnerisooq nassuiarneqarpoq.*

**Ilusiliaq 1: Periarfissanut ilusiliani assigiinngitsuni assartuussinermut akiusut qaffannerat**



Najoqqutarisaq: Royal Arctic Line A/S

*Takuneqarsinnaavoq ungasissoq eqqarsaatigalugu periarfissatut ilusiliani umiarsualivimmut nutaamut aningaasaliisoqartussaatinngalu assartuussinermut akiusut qaffannerusussaasut. Aammattaaq paasisat takutippaat attartorneq ataatsimut isigalugu nutaanik umiarsualiornerneerit akikinnerusussaasoq. Oqaatigineqareersutut assiliaq 2014-imi imaluunniit 2015-imi taamatut aamma isikkoqassasoq oqartoqarsinnaanngilaq, tassani nutaamik umiarsualiornerneerit aamma attartorneerit niuerfik allannorsimasinnaammat.*

*Tamatuma saniatigut nutaanik sanasoqassanersoq imaluunniit attartortoqassanersoq aalajangiinissaq apeqqutinut allanut atasuuvoq, assersuutigalugu najukkani suliffissaqartitsiniarnerneerit, akiitsut ineriartorerannut sunniutaasussat allallu malittaasumik sunniutaasussat.*”

*Sanaatornerneerit aningaasartuutit*

Inatsisartut UKA 2013/18-imut ilaatillugu umiarsualivimmut suliassamut aningaasartuutissat sammivaat. Sanaatornerneerit Ataatsimiititaliap isumaliutissiissutaa 25. november 2013-imeersoq ilanngussartaqartoq, ilanngullugit ilanngussat 8, 10, 11 aamma 12 innersuussutigineqarput.

Suliassaqarpallaalernerata malitsigisaanik sanaartornermut aningaasartuutit qaffasinnerulersinnaanerannut apeqqut immikkut akineqarpoq, takuuk Sanaartornermut Ataatsimiititaliap isumaliutissiissutaa 25. november 2013-imeersoq, ilanngussaq 10 (Qeqqata Kommuniianiit apeqqummut 8-imut akissuteqaatit).

Nalakkersuisut allapput:

*”Pingaarnertigut isigalugu nunatsinni suliffinnik pilersitsinissaq Naalakkersuisunit kissaatigineqarpoq. Pitsaanerpaamillu taamaaliortoqarsinnaavoq aningaasaliinerit imminut akilersinnaasut naammassineqarnerisigut. Allakkami matumani soorlu allaaserineqartoq aningaasaliineq taanna imminut akilersinnaasutut annertuumik nalilerneqarpoq.*

*Peqatigisaanik eqqaaneqassaaq Nuummi, Sisimiuni imaluunniit Ilulissani taamatut annertutigisoq pisariusorlu pilersaarut sulisunit avataaneersut tikiseqqaarnagit naammassineqarsinnaanngilaq.*

*Pilersaarummi nunaqavissut annertunerusumik peqataatinnissaat siunertaralugu SIK-mik sulisitsisullu kattuffiini Naalakkersuisut oqaloqateqarput, tassunga ilanngullugu ilinniarfissat il.il. qulakkeerneqarneri. SIK aamma GA nuna tamakkerlugu kattuffiusut, Nuup avataani sulisinnaasut pilersaarummi tassani sulilernissaannut ataatsimoortumik Namminersorlutik Oqartussanik kommuninillu soqutiginnittuupput.*

*Sanaartugassaqarpallaarnera pillugu apeqqummut tunngatillugu piffissap qanoq ilinera pilersaarusernerlu apeqqutaassapput. Qeqqata Kommuniata tassunga atatillugu taavaa 2014AIS-imi Nuup umiarsualivia aamma Naalagaaffiup Nuummi parnaarussivimmik pilersitsinissaanut qaleriittoqartoq. Paasineqarpoq ingerlatsinerit taakku pingasut ataqatigiissaarneqarsimangitsut, peqatigisaanilli naliliisoqarluni kingunissai Qeqqata Kommuniianiit oqaatigineqartutut ilungersunartiginatik.*

*2014AIS eqqarsaatigalugu eqqunngilaq kommunimit allanneqartutut taamatut annertutigisut Nuummut tutsinneqassasut. Sanaartornermi aningaasat nunamut tamarmut agguarneqarnissaat qulakkeerniarlugit sulineq aallartinneqarpoq – pingaarporli sanaartornermi pilersaarummi aamma siunertaqartussaammat. Taamaattumik aningaasaliinernik innuttaasunut annertunerpaamik sunniuteqartitsisunik nassaarnissaq pillugu Namminersorlutik Oqartussat kommuninik oqaloqateqarput.”*

*Usinut tunngatillugu ingerlasussanik piareersaasarneq aamma imaatigut assartuussinerup allannortinnissaa*

Nuummi umiarsualiviliornissaq Kalaallit Nunaannut, Kalaallit Nunaannit aamma Kalaallit Nunaanni usinik imaatigut angallassinerup, ingerlasussanik pilersaarusernerup passussinerullu pitsanngorsarneqarnissaanut ilaatillugu pissaaq. Nuummi nutaamik

umiarsualiviliorneq illoqarfinni nunaqarfinnilu usinik pilersuineranut ataatsimoortumik aaqqiissutissamut ilaatillugu pissaaq.

Naliliisoqarpoq Nummi nutaamik umiarsualiviliorneq aamma Royal Arctic Line A/S-ip usinik assartuussisarnerata allanngortinneqarnera, sinerissami illoqarfinnut ataasiakkaanut taakkunangaanniillu usinik assartuussineranut piffissanut uninngaviusartunut aamma piffissanut assartuussiviusartunut aalajangiisuusumik pingaaruteqassanngitsoq.

Naliliisoqarpoq Nuummi nutaamik umiarsualiviliorneq maannakkut atuuttut allanngortinnagit attatiinnarneranni, assartuussineranut akiusut qaffannissaannut naatsorsuutigineqartunut annikillisitseqataassasoq.

Inatsisartut UKA 2013/18-imut ilaatillugu nunap immikkoortuinut ilanngullugulu Aasiannut aamma Sisimiunut pingaaruteqarnera sammivaat. Sanaartornermut Ataatsimiititaliap isumaliutissiissutaa 25. november 2013-imeersoq, ilanngussaq 8 (Inatsisartut Sanaartornermut Ataatsimiititaliaannit apeqqutitut 4 – 8-inut akissuteqaatit) aamma ilanngussaq 10 (Qeqqata Kommunianit apeqqutitut 1-3-imut, 6-7-imut, 12-imut akissuteqaatit) innersuussutigineqarpoq.

*Kisermaassinerit aamma kajumissuseqalersitseriaasissat.*

Inatsisartut UKA 2013/18-mut ilaatillugu Royal Arctic Line A/S-ip aamma umiarsualiviutileqatigiiffiup nutaap (SIKUKI Nuuk Harbour A/S) ataqatigiinnerat pillugu apeqqut sammivaat. Sanaartornermut Ataatsimiititaliap isumaliutissiissutaa 25. november 2013-imeersoq imm. 8.5 (piginnittuuneranut tunngasut) ilanngullugulu ilanngussaq 8 (Qeqqata Kommunianit apeqqummut 9-imut akissuteqaat) aamma ilanngussaq 12 (Qeqqata Kommunianit apeqqutitut 12 -14-imut akissuteqaat) innersuussutigineqarpoq.

Naalackersuisut Nuummi umiarsualivimmik nutaamik sanaartornissamut ingerlatsinissamullu umiarsualiviutileqatigiiffimmik pilersitsinissaq pillugu siunnersuutaanni aalajangiisuulluinnartumik pingaartinneqarpoq, Namminersorlutik Oqartussat umiarsualivimmik aammalu taassuma periusissiatigut aalajangiinerinik nakkutiginninnerat qulakkeerneqassasoq, ilanngullugu umiarsualivimmi sullissineranut akinik aalajangersaasarnermik nakkutiginninneq.

Aammattaaq siunnersuummi § 1, imm. 5 malillugu ingerlatseqatigiiffiup siunertaraa ilaatigut umiarsualivimmik aningaasartuutitigut sunniuteqarluartumik ingerlatsinerup qulakkeernissaa taamaalillunilu Kalaallit Nunaannut, Kalaallit Nunaannit aamma Kalaallit Nunaanni sunniuteqarluartumik imaatigut assartuussineranut iluaqutaanissaa.

Ilanngussaq 8-mi Qeqqata Kommunanit apeqqummut 9-imut akissuteqaatit ilaatigut tamanna pillugu allassimavoq:

” . . . Selskabinik taakkunannga piginnittutut [Royal Arctic Line A/S & SIKUKI Nuuk Harbour A/S] Naalackersuisut kissaatigaat, isumaqatigiissutini ersersinneqassasoq aaqqissuussinermik pisariaqartitsinermi aningaasartuutit annikillisarneqarnissaat aammalu ingerlaavartumik ingerlatsinermik annertusaasuussasoq, qulakkeerneqassasorlu assartuinermi akinik qaffaanissamik pisariaqartitsinerup ataatsimut isigalugu annikillisarneqarnissaa. Taamaattumik Royal Arctic Bygdeservicep (RAB) sinneqartooruteqarnissaanik qulakkeerinissamik isumaqatigiissutit isumaliutigeqqinneqartariaqarput, taamaaqataanillu umiarsualivinnut inatsisaalersussami UPA 2014-mi saqqummiunneqartussatut eqqarsaataasumi, umiarsualivimmik atuinermut akiliuteqarnissamut periarfissiinissaq tamatumani ersittariaqarluni. . . . ”

Umiarsualiviit pillugit Inatsisartut inatsisissaattut siunnersuummi, taamatuttaaq UKA 2014-imi suliarineqartussami, umiarsualivinnik nunami sanaartugartaqartunik atuinermut akiliisitsisalernissamik periarfissaq maleruagassiivigineqarpoq. Umiarsualiviit pillugit Inatsisartut inatsisissaattut siunnersuummi § 16, imm. 3 malillugu akigitat aamma akiusunut tunngaviusussat kiisalu umiarsualiviutileqatigiiffimmut tassani allannguutissat Naalackersuisunit akuerineqartartussaapput. Umiarsualiviit pillugit Inatsisartut inatsisissaattut siunnersuummi § 21, imm. 3 malillugu umiarsualivinnut pisortanit pigineqartunut akigititani aamma akiusunut tunngaviusuni sapinngisamik annertunerpaamik qulakkeerneqassaaq, akiusut tunngavigalugit umiarsualiviit umiarsualiviutileqatigiiffinnit pigineqartut aamma umiarsualiviit pisortanit pigineqartut akornanni unammilleqatigiinnermik equitsinermik pisoqassanngitsoq.

Nuuk Transport A/S

“Nuuk Transport suliffeqarfuit namminersortut anginersaraat, suliassa qarfigisaa pingaarnertut Nuup umiarsualivianut attuumassuteqarluni. Usilersornermik usingiaanermillu, containerenik immiinermik, inuttanik attartortitsinermik, assartuussinernik allarpassuarnillu umiarsualivinni assartuussinernut tunngasunik sullissinernik neqerooruteqartarpugut.

*Inatsisissatut siunnersuutip ilanngussartaani qulaani pineqartumi aammattaaq taaneqarsimagatta assut eqqumigaarput, tusarniaassutigineqartoq uagutsinnut nassiunneqarsimangimmat - pingaartumillu tusarniaatitsisoqarniarnera uagut paasiniaaffigisinnaasimangilarput, Namminersorlutik Oqartussat pisortatigoortumik tusarniaatitsinermi digitalikkut nittarsaassivigisartagaani ersinngimmat. Inatsisissatut siunnersuut aatsaat allaniit paasileratsigu, tusarniaatitsinermut piffissaliussap naannginnerani akissuteqarnissatsinnut periarfissaqarsimangilagut.*



*Matumuuna oqaaseqaatigiumasagut nassiuppagut, inatsisip imarisaata ilaa ingerlatseqatigiiffinnik pisortanit pigineqartunik unammilleqatigiinnikkut kipusoortitsisinnaasutut isigigatsigu, tassa soorlu SIKUKI-mut kiisalu RAL-imut. Tusarniaatitsinerup ingerlanneqarnerani qulaani amigaatit pineqartut pissutigalugit naatsorsuutigaarput, inatsisissamut oqaaseqaatigisagut ilanngullugit isiginiarneqarumaartut naak tusarniaatitsinermut akissuteqaapput kingusinaartumik nassiunneqaraluatoq.*

### ***Nalinginnaasumik oqaaseqaatigineqartut***

*Ullumikkut RAL-ip Kalaallit Nunaanni avataanilu assartuineq kisermaappaa, taannaannarli kisiat suliarinngilaa, aammali namminersortunut unammillertarpoq tassunga ilanngullugit shippingselskabenut aammalu assartuussisunut ingerlatseqatigiiffiup immikkoortortai arlallit aqutigisarlugit, assersuutigalugu soorlu Royal Arctic Logistics.*

*Allaat RAL-ip suliassatigut unammilleqatigiinnermut kipusoortitsisinnaasumik ingerlatsinaveersaarnissani ajornakusoortittarsimallugu tassunga ilanngullugu ingerlatseqatigiiffiup nammineq immikkoortortaanik, pisortat inuussutissarsortunut tapiissutaannik atuisoqarnissaa toqqaannartumik innersuussutigalugu, umiarsualiveqarnermullu oqartussaasutut suliffeqarfiit allat umiarsualivimmi suliassaannik kingullinnguuttarlugit ingerlatseqatigiiffiup nammineq immikkoortortaanut sanilliullugit.*

*Tamanna matumani ataasiakkaanik assersuuteqarfigissavarput:*

- *Pisoq siullemq tassa umiarsualivimmik atuinitsinnut tunngatillugu tassani ajornartorsiutigiligarput tassaavoq, 2013-imi ingerlatseqatigiiffinnik uuliasiortunik sullissinissamut Arctic Base Supply ajugaaffigigatsigu (Attaveqaatinut Naalackersuisoqarfiup attaveqarfigineqarnera takuuk).*
- *Aappaasaanik pisoq tassa, RAL-ip inuussutissalerinermik nakkutilliisoqarfimmuut nalunaaruteqarneratigut umiarsualivimmi containerenik immiisarnissatsinnut periarfissarput unitseriaraluarmagu (attaveqatigiissimanerit nassiunneqarsinnaapput)*
- *Pisullu pingajuat qanittukkut pisimasuuvoq. Tassa biilit usisaassuit Danmarkimut nassiunnialeratsigit Royal Arctic Logistics imminut nassiussisussanngortissimavoq - tamannalu nassiussaleriviup isumaa malillugu allanngortinneqarsinnaasimannngilaq! ( nassiussat allagartaat uppernarsaatitut nassiunneqarsinnaavoq)*

*Qulaani pisimasut tunngavigalugit pissutsit taamatut sukangasuumik ataqatigiissaarneqarneri assut ernumanartoqartippagut, inatsisikkut nutaakkut RAL kiisalu Nuummi umiarsualivik taakkununnгалu oqartussaasut taamatut ingerlaqqiinnassammata.*

*Nunaminertanik umiarsualivimmuut atasunik attartortitsisarnissamik pilersaaruteqarneq immineq ajornartorsiutaannngilaq, tamatumuuna namminersortunut assersuutigalugu*

*quersuarnik attartortunut, nassiussalerisunut assartuisartunullu naapertuilluartumik ammasumillu unammilleqatigiittoqassappat.*

*Tamatuma saniatigut umiarsualivimmi nassiussalerisarneq naapertuilluartumik ammasumillu tunngaveqarluni ingerlanneqartariaqarpoq. Maannakkut umiarsualivimmi kranenik pitaarnissaq pilersaarutaavoq, qallunaat aningaasanngorlugit 60 millioninik akilinnik, ullumikkut Nuummi sippulinnik, naammareersunik kraneqaraluartoq - tamatumali umiarsualivik RAL-ilu umiarsualivimmi nassiussalerinikkut tamakkiisumik kisermaassisunnngortissavai, tamatumuuna naapertuilluartumik ammasumillu unammilleqatigiittoqarnissaata qulakkeerneqarnissaa sulissutigineqanngippat.*

*Tunngaviatigut umiarsualivik RAL-ilu containerinik immiisarnermi aammattaq kisermaassisuupput taamaalillutillu aamma tassunga atatillugu umiarsualivimmi assartuussisarnikkut suliassanik allarpassuarnik ingerlataqartarlutik.*

*Uuliasiortunik- aatsitassarsiortunillu siunissami sulissussisarnissat RAL-imit aammattaq kisermaanneqariataannaapput. Siusinnerusukkut taamaaliorialuarnikuupput, umiarsualivittaaruttali taamaalerialaannaapput, tamatumuuna naapertuilluartumik ammasumillu unammilleqatigiittoqarnissaata qulakkeerneqarnissaa sulissutigineqanngippat.*

*Kalaallit Nunaanni namminersortunik inuussutissarsiortoqarpoq, attuumassuteqanngitsumik ammasumillu unammilleqatigiittoqarnissaanik qulakkeerinnissinnaasunik aammalu akigititanik qaffasereeqisunik pakkersimaarinnissinnaasunik. Ataatsimut isigalugu oqaaseqaatini suleriaasissatut ilusiliunniagaq tamanna SIKUKI Harbourimut aammaarluni kisermaassiniarnermik kinguneqartussaassaaq taamaalillunilu aamma Kalaallit Nunaanni namminersortulit inuussutissarsiutilinnut suliassanik pilersaarusiortarnikkut assartuussinikkullu assigiinngisitsinerussalluni. Tamanna siunissami nunatta aningaasaqarneranut ajutoorutaasinnaavoq.*

### ***Erseqqissaatitut oqaaseqaatigineqartut***

*Siunnersuummi § I-imut oqaaseqaatini allassimavoq, Nuummi maannakkut umiarsualiviusoq nunap qaani atortulersuutitai ilanngullugit tigutsisissatut aningaasaliissutinik aningaasaliivigineqarsimasoq. Aammattaq allassimavoq, illuutit umiarsualivimmiittut, ilaatigut Nuuk Transportimit pigineqartut ilanngunneqassanngitsut.*

*Matumani erseqqissaatigisariaqarparput, Nuup umiarsualiviani ileqquusumik pisinnaatitaaffigitinneqartut innarleqqussaannngimmata, ataqqineqartussaallutilli. Tamatuma saniatigut Godthåb Fiskeindustri Nuuk Transportip eqqaaniittoq nunaminertanik annikittukkuutaanik atugassinneqarnikuvoq, ilaatigut kranenut assigisaannullu atugassatut, aammattaq ataqqineqartariaqartunik.*

*Iluaqutaasimassagaluarpoq, umiarsualivimmi nunaminertanik atugassiissuteqarnissaq namminersuutigalugu aalajangersaannnginnermini, Kommuneqarfik Sermersuup umiarsualivimmi atortunik piginnittut tamatumuuna oqaaseqaateqarusunnertut apereqqaarsimasuugunigit.*

*Aamma Namminersorlutik Oqartussat Nuup umiarsualiviani nunaminertanik atuinermut tunngasut isumaqataaffigineqarnersut nammineeirlutik qularnaarsimasinnaagaluarpaat, suliap aningaasartaanut pingaarutilimmik attuumassuteqarmata siunissamilu taarsivigitinnissamut piunasaqaateqartoqarnissaanut pissutissaqartitsilersinnaallutik.*

***Immikkoortussatut siunnersuutit, inatsimmi qularnaarneqartariaqaraluarput.***

*Namminersorlutik inuussutissarsiortut umiarsualivinni suliagarfiit tunngaasigut matumani SIKUKI pillugu inatsimmi kiisalu umiarsualiveqarneq pillugu inatsimmi illua-tungiusutut annerusumik ilaatinneqartariaqarput, taamaaliornikkut suliffeqarfiit namminersortut kiisalu Nuup umiarsualiviani pisortat kisermaassillutik ingerlatsisut akornanni nunatsinnilu umiarsualiviit ataatsimut isigalugit ammasumik naapertuilluartumillu unammilleqatigiittoqarnissaa qulakkeerneqassammat.*

*Assartuinikkut kisermaassilluni ingerlatsinerit, RAL-imut tunniunneqarsimasut, suliassallu, namminersortunik suliarineqarsinnaasut akornanni, Namminersorlutik Oqartussat ammasumik naapertuilluartumillu unammilleqatigiittoqarnissaanut naapeqatigiisitsiniartariaqarpoq.*

*Umiarsualiveqarnermut oqartussaaffik namminersortunngortittariaqarpoq, taamaalilluni suliffeqarfiup pisariaqartitai salliutinneqarlutik suliffeqarfittullu kisermaassisuuneq siunissami umiarsualivimmik atuinissamut suliassanullu atugassatut nunaminertanik atugassiisuteqartarnermi salliutinneqarunnaarlutik.*

*Nuup umiarsualiviata pisoqartaani nunaminertanik atugassiisuteqartarneq atuisinnaatitaanerlu pillugit isumaqatigiittoqarnissaanut akisussaaffimmik tigusinissartik Namminersorlutik Oqartussat piaartumik qularnaartariaqarpaat.”*

Akissut

Siullermik erseqqissaatigineqassaaq, SIKUKI Nuuk Harbour A/S-imik pilersitsinermi siunertarineqanngimmat, taassuma angallassinermi assartuinermilu kalaallit suliffeqarfiinik unammillertoqalernissaa. Paarlattuanik siunissaq eqqarsaatigalugu siunertarineqarpoq SIKUKI Nuuk Harbour A/S-ip umiarsualivinni oqartussaannermik isumaginnittuunissaa. Tamatuma isertuussinnginnissaaq annertusassavaa, taamatummi isumaginnittarneq RAL-ip ataaniikkunnaarmat, naammassineqarsinnaasut pillugit maannakkumut tamanna atuuffigisimagaluarlugu.

Allaaserineqartutut SIKUKI Nuuk Harbour A/S sanaartorneqassaaq, maannakkut umiarsualivimmi atortorisat Kalaallit Nunaannut tassanngaanniillu nioqqutissanik pilersuinerup amigartarnera pillugu naammagineqanngitsutut nalilerneqarmat, taamatuttaaq atorluarneqarsinnaasumik angallassinermi nutaamik ineriartortitsinissamut mikivallaalersimammat.

Umiarsualivimmi atortulersuutit nutaat RAL-ip umiarsualivimmut nutaamut nuunneqarnissaat periarfississavaa, taamaalillunilu umiarsuarnik anginerusunik atuilersinnaalersillugu. Tamatuma kingunerissavaa Nuummi umiarsualiviup nunaminertai maanna atuuttut ingerlaturanut allanut atugassanngortinneqarsinnaalernissaat, kingornalu taakkua namminersorlutik ingerlatsisunut neqeroorutigineqarsinnaalissapput imaluunniit taakkua suleqatigalugit ineriartortinneqarsinnaalissallutik. Taamaalilluni taamatut allanut isumagisassanngortitsinerit umiarsualivimmi suliffeqarfiit namminersortut ingerlataannik ikiorsiissapput. Tamatumali qanoq pinissaa suullu piumasaqaataassanersut apeqqutaassaaq umiarsualiviit pillugit inatsit nutaaq akuersaarneqarpat kiisalu tamatuma kingunerisaanik aaqjissuussaankkut iluarsiinissat.

Umiarsualivimmi kivittaatit aningaasaliiffigineqarnissaat pillugu tamatumani peqqutaatinneqarput kivittaatit nuuttakkat, containerinik pisariitsunnguamik isumaginnissinnaasut. Kivittaatit nutaat umiarsuarnit containerinik usisartaatiniit usilersuinermit usingiaanermullu atorineqartassapput, taakkualu angallassinermi aaqjissuussaannermit nutaamut ilaatinneqartussaataapput, Kalaallit Nunaannut pilersuinermit atugassat Nuummut, umiarsuarnut anginerusunut kivittaateqanngitsunut atugassatut, ingerlanneqartassallutik. Kingorna assartueqqittarneq Nuummiit umiarsuit mikinerusut atorlugit ingerlanneqartassaaq. Taamaaliornikkut pisariillisaaneq tamanna kivittaatinik nutaanik pisariaqartitsilissaaq, suliassammi taakkua kivittaatit maannakkut atorineqartut isumagisinnaanngimmatigik.

Maannakkut maleruagassat naapertorlugit Namminersorlutik Oqartussat qitiusumik umiarsualivinnut oqartussaasuupput, oqaatigineqareersutullu umiarsualivinnik oqartussaaneq tamanna pisariillisaanissaaq eqqarsaatigalugu RAL-imut, umiarsualivimmi annertunerpaamik suliaqartartumut, isumagineqartarpoq. RAL-ip marloqiusamik, umiarsualiveqarfinnik atuisutut kiisalu qitiusumik umiarsualivinnut oqartussaasutut, atuuffeqalernera peqqutigalugu siunissaaq eqqarsaatigalugu pissusissamisussaaq, umiarsualivimmik oqartussaasutut atuuffik SIKUKI Nuuk Harbour A/S-imut nuunneqassammat, taamaaliornikkut killilersuutit ersarissisillugit ingerlallualernissarlu qularnaarlugu.

Taamaattumik SIKUKI Nuuk Harbour A/S-imut umiarsualivimmik oqartussaassutsip nuunneqarnerata kingunerissanngilaa namminersorlutik inuussutissarsiuteqartut kisermaassilernissaat pingaartinneqarnerulernissaallu, paarlattuanilli suliassaqarfimmi ilisimanninnerulernissamut ilapittuisuussalluni, taamatuttaaq Kalaallit Nunaanni assartuinermit namminersorlutik suliaqartartut atugassarisaat ikorfartuiffigissallugit.

## **Inatsisissatut siunnersuummi aalajangersakkanut ataasiakkaanut nassuiaatit**

### *§ 1-imut*

Imm. 1-imut

Ingerlatseqatigiiffik 100 mio. koruunit tikillugit aktiaatinik aningaasaataqartumik pilersinneqarpoq. Ingerlatseqatigiiffik pilersinneqassaaq aammalu aktiat allatigut aktiaatileqatigiiffinnut inatsimmi maleruagassanut naapertuuttumik atsiorneqassallutik, takuuk aktiaatileqatigiiffiit pillugit inatsisip Kalaallit Nunaannut atuutsinneqalernissaa pillugu peqqussut nr. 620, 23. juni 2008-imeersoq.

Aalajangersagaq kingusinnerusukkut ingerlatseqatigiiffiup aningaasaataasa qaffanneqarnissaannik aalajangiinissamut akornutaanngilaq. Aningaasaatit qaffannissaat pillugu aalajangiineq aktiaatileqatigiiffinnut inatsimmi maleruagassanut naapertuuttumik pissaaq.

Inatsisartut UKA2013/18-imi aalajangiinerannut naapertuuttumik SIKUKI Nuuk Harbour A/S 2013-imi pilersinneqarpoq aammalu maannakkuugallartoq kr. 55 mio.-inik aktiaatinik aningaasaateqarluni. Aktiaatinit aningaasaatit Naalakkersuisunit atsiorneqarput aammalu Namminersorlutik Oqartussanit pigineqarlutik. Aktiaatinit aningaasaatit aningaasanngorlugit 25 mio. koruunit aammalu allarniutissatut 30 mio. koruunit akiliutigineqarnerisigut atsiorneqarput. 2014-imi pilersinneqarnerata kingorna 45 mio. kr. aningaasaliissuteqaqqittoqarpoq.

Aallarniutissatut akiliutissatut Nuummi umiarsualivik nunami sanaartugartaqartoq pioreersoq akiliutigineqassaaq. Namminersorlutik Oqartussat aamma Kommuneqarfik Sermersuup akornanni oqaloqatigiinnerit tunngavigalugit umiarsualivimmut aammalu nunami sanaartugartaannut killissalersorneqartumik Namminersorlutik Oqartussanut nunaminertamik atugassiissuteqarnissaaq akuerineqarpoq.

Nuummi umiarsualiviup sumiiffiani illuutit sananeqarsimasut ilaatigut Royal Greenland A/S-imit, Royal Arctic Line A/S-imit aamma Nuuk Transport A/S-imit pigineqarput. Illuutit taakkua nunaminertanut pisinnaatitaaffittaqtartut suliap pissusissamisoornerani nunaminertamik atugassiissutaasumi Namminersorlutik Oqartussanut nalunaarutigineqartumi pineqartunut ilaanngillat. Illuutit pioreersut allannguuteqartinnagit aammalu inatsisit atuuttut aamma nunaminertamik atugassiissuteqarnermut atugassarititaasut naapertorlugit atorineqarsinnaapput.

Imm. 2-imit

Ingerlatseqatigiiffiup taaguutigaa SIKUKI Nuuk Harbour A/S. Ingerlatseqatigiiffik tamanna naleqquttutut nalilerneqartillugu, suliffeqarfinnik allanik saniatigut taaguutaateqartinneqartunik ingerlatsisinnaavoq.

SIKUKI Nuuk Harbour A/S-imit pilersitsinermut atatillugu malittarisassani aalajangerneqarpoq ingerlatseqatigiiffik aamma assigiinngitsunik saniatigut taaguuteqartinneqartunik suliffeqarfinnik ingerlatsisinnaasoq. Ataatsimeersuarnermi tamanna naleqquttoq paasinarsisimappat, saniatigut taaguutissat allat pillugit aalajangiisoqarsinnaavoq.

Ingerlatseqatigiiffiup saniatigut taaguutaannik allanik aalajangiisoqassappat ataatsimeersuarnermi aammalu aktiaatileqatigiiffinnut inatsit aamma ingerlatseqatigiiffiup malittarisassai naapertorlugit tamanna pissaaq.

Imm. 3-imut

SIKUKI Nuuk Harbour A/S ingerlatseqatigiiffiuvooq 100 %-imik Namminersorlutik Oqartussanit pigineqartoq. Ingerlatseqatigiiffiup aktiaatinik aningaasaatai Naalakkersuisunit atsiorneqarput aammalu Namminersorlutik Oqartussanit pigineqarlutik.

Ingerlatseqatigiiffiup aktiaatinik aningaasaatai 45 mio. koruuninik qaffanneqaqqipput taamaalillunilu ingerlatseqatigiiffiup aktiaatinik aningaasaatai inaarutaasumik 100 mio. koruuniussapput. Aningaasaatit qaffaataat Naalakkersuisunit atsiorneqassaaq aammalu Namminersorlutik Oqartussanit pigineqassalluni.

Imm. 4 – 5-imut

Imm. 4 – 5-imi ingerlatseqatigiiffiup siunertaa maleruagassiivigineqarpoq.

Ingerlatseqatigiiffik niuerneramik tunngaveqartumik ingerlanneqassaaq. Siunertarineqanngilaq ingerlatseqatigiiffik annertuumik sinneqartooruteqassasoq, taamatuttaaq aamma siunertaanngilaq ingerlatseqatigiiffik aktiaatilinnut agguagarsiassanik tunniussisassasoq. Ingerlaavartumik anguniarneqassaaq ingerlatseqatigiiffiup aningaasaqarnera siunissami umiarsualiviup allilerneqarnissaanut naatsorsuutigineqartumut tunngaviusussamik patajaallisarneqassasoq. Ingerlatseqatigiiffik ingerlatsinerminut Naalakkersuisunit tapersiissuteqarfigineqartassanngilaq.

Nunami sanaartukkat ilanngullugit umiarsualivimmik atuinermut akiliutinut sukumiiinerusumik malitassat inatsisitigut aalajangerneqassapput. Nunami sanaartukkat ilanngullugit umiarsualivimmik atuinermut akigititat akigititanullu tunngaviusut umiarsualivimmi ingerlatseqatigiiffiit immikkut ataasiakkaarlutik suliaasa katinneri tunngavigalugit aalajangerneqartassapput, umiarsualivimmik nunami sanaartukkat ilanngullugit pilersitsinermut, ingerlatsinermut, ernianut nalikilliliinernullu atatillugit aningaasartuutit ilanngullugit.

Ingerlatseqatigiiffiup niuerneramik tunngaveqartumik ingerlanneqartussaana isumaqanngilaq ingerlatseqatigiiffiup sapinngisamik annertunerpaamik sinneqartooruteqarnissaaq imaluunniit aktiaatillit aningaasaataasa amerlisinnissaat anguniassagaa. Kisiannili ingerlatseqatigiiffiup anguniassavaa, aningaasaatinut upalungaarsimanermi sillimmatit pigisami sukkulluunniit ingerlatseqatigiiffiup ingerlanneqarneranut tunngatillugu isumannaatsuussasoq aammalu ingerlatseqatigiiffimmi ingerlatsineq, ingerlatseqatigiiffimmut Nuummi umiarsualivimmik nunami sanaartugartaqartumik illuutitaqartumillu sananissamut, piginnittuunermut ingerlatsinernullu suliaqarnissamut periarfissaqalersitsisumik sinneqartooruteqassasoq.

Ingerlatseqatigiiffik sunniuteqarluartumik aningaasartuuteqartillugu ingerlanneqassaaq. Umiarsualiviutileqatigiiffinnut taamaaqataanik suliaqarnernik ingerlatsisunut tunngatillugu aningaasartuutit ineriartornerat ingerlatseqatigiiffiup ingerlaavartumik nalilersortassavaa. Umiarsualiviup aningaasartuutaasa ineriartornerannut siunnerfinnik uuttorneqarsinnaasunik aalajangersaanissaq anguniarneqassaaq.

#### § 2-imut

##### Imm. 1-imut

Imm. 1-imi siulersuisut ataatsimoorlutik piginnaaneqarnerisa qaffasissusissaat aalajangersarneqarpoq. Siulersuisut immikkoortortatut nalinginnaasumik inuussutissarsiornermi aqutsisutullu piginnaaneqarnernik pigisaqassapput kiisalu umiarsualivimmik nunami sanaartugartaqartumik illuutitaqartumillu ingerlatsinermut ilisimasaqassallutik.

Pikkorissuseqarnissamut piumasaqaatit siulersuisut suliassaqarfini ingerlatseqatigiiffiup suliaqarfigisassaanni annertuumik misilittagaqartuunissaannik pikkorissuseqarnissaannillu qulakkeerinissamut iluaqutaassapput. Siulersuisut inunnik pikkorissunik uppersarneqarsinnaasumik suliatigut piginnaaneqartunik ilaasortaqaassapput, aammalu siulersuisut katitigaaneranni qulakkeerneqassaaq, siulersuisut ataatsimoorlutit isigalugit, siulersuisut sukkulluunniit suliassaminnik sapinngisamik pitsaanerpaamik sularinnissinnaanissaannut pisariaqartunik piginnaasaqartut.

SIKUKI Nuuk Harbour A/S nuna tamakkerlugu umiarsualivittut pingaarnertut atuutissaaq. Taamaattumik siulersuisut containerersorluni assartuussinermut kiisalu pissutsinut aalisarnermik inuussutissarsiuteqartut nioqputissanik imaaneersunik avammut annissuinerannut tunngasunut ilisimasaqartuussapput.

Ingerlatseqatigiiffiup ukioq siulleq ingerlanerani aammalu umiarsualivimmik nunami sanaartugartaqartumik sanaartorneq pingaartumik sammineqarnerani, siulersuisut katitigaaneranni immikkut piumasaqaatit piginnaasaqarnerillu piumasaqaatigineqartut takuneqarsinnaassapput.

##### Imm. 2-imut

Siunnersuummi imm. 2 ataatsimeersuarnerup aktiaatileqatigiiffinnut inatsit malillugu siulersuisuni ilaasortanik toqqaanissamut ilanngullugulu siulersuisut nutaamik toqqaanermi katitigaanerannik allannguuteqartitsinissamik nalinginnaasumik pisinnaatitaaffiik annikillitsinermik malitseqassanngilaq.

Siunnersuummi imm. 2 pineqaatissiiviusussaassanngilaq aammalu taamaallaat ataatsimeersuarnermi siulersuisuni ilaasortassanik toqqaanerup aamma nutaamik toqqaanerup ilaatut isigineqassalluni. Taamaattoq ataatsimeersuarneq siunnersuummi imm. 2-imi piumasaqaatinik naammassinninngitsunik siulersuisuni ilaasortassanik toqqaasinnaanngilaq.

§ 2, imm. 2, nr. 1 malillugu Inatsisartuni imaluunniit Naalakkersuisuni ilaasortaq siulersuisunut toqqarneqarsinnaanngilaq. Siulersuisuni ilaasortaaneq ilaatigut Naalakkersuisut ataatsimeersuarnermi nakkutiginnittutut atuuttussaanerannut aammalu ingerlatseqatigiiffimmut tunngatillugu oqartussaasutut inissisimanermut naleqqiullugu, ilaatigullu Inatsisartut Naalakkersuisunut tunngatillugu nakkutiginninnerannut naleqqiullugu soqutigisanik aporaattoqarneranik tunngaviatigut kinguneqarsinnaassaaq.

Siunnersuummi imm. 2, nr. 1 – 2-imi aamma nr. 5-imi aalajangersakkat kinaassusersiunngillat aammalu apeqqutissanik pilersitsissanatik. Imm. 2, nr. 5-imi inuit akileraartarnermut inatsimmik imaluunniit aningaasaqarnikkut pinerluuteqarsimaneq pillugu pinerluttulerinermut inatsimmi aalajangersakkanik ilungersunarnerusumik unioqquitsinermut eqqartuunneqarsimasut siulersuisuni ilaasortaasinnaatinneqanngillat.

Imm. 2, nr. 2-4-imi siulersuisunut ilaasortanut ilaalu ilanngullugit akiliisinnaassuseqarnissaq, ataqqinassuseqarnissaq aamma atuussinnaassuseqarnissaq pillugu piumasaqaatit aalajangersarneqarput. Aalajangersakkat taamaaqatai aningaasaateqarfiit aamma peqatigiiffiit aalajangersimasut pillugit inatsisip Kalaallit Nunaannut atuutsinneqalernera pillugu peqqussut nr. 917, 15. december 1998-imeersumi § 11, imm. 2-4-imi kiisalu aningaasaateqarfiit inuussutissarsiornermik ingerlatsisut pillugit inatsisip Kalaallit Nunaannut atuutsinneqalernera pillugu peqqussut nr. 621, 23. juni 2008-imeersumi § 14, imm. 2-4-imi takuneqarsinnaapput. Aningaasaateqarfinnut inatsimmut tunngatillugu siunnersuummi imm. 2, nr. 2, akiliisarnermik unitsitsinermi ilaasortaajunnaartarnissaq pillugu piumasaqaammik ilassuserneqarpoq.

Siunnersuummi imm. 2, nr. 3-4 ataqqinassuseqarnissamik atuussinnaassuseqarnissamillu piumasaqaatinut tunngasut inatsisini malitassatut iluseqarput. Aalajangersakkani siunertaavoq siulersuisuni ilaasortat annertuumik tatigineqarnerisa aammalu isumannaatsumik siulersuisutut atuunnerminnik isumaginnissinnaanerisa suli eqqumaffigineqarnissaata qulakkeerneqarnissaa. Ataatsimeersuarneq aalajangersimasumik nalilersuineq malillugu aalajangiisussaavoq inuk siulersuisuni ilaasortaasoq imaluunniit siulersuisunut toqqarneqartussatut eqqarsaatigineqartoq siunnersuummi imm. 2, nr. 3-4-imi pineqartunut ilaasutut igisineqarsinnaassanersoq.

Siulersuisuni ilaasortaq siunnersuummi imm. 2, nr. 3-4-imi pineqartunut ilaasutut isigineqartariaqarnerasoq ataatsimeersuarnermi nalilersuinermi aalajangiinermilu, aningaasaateqarfinnut inatsit malillugu tunngaviusut malitassallu taamaattut pingaartinneqarsinnaapput.

Napparsimanermi imaluunniit allatut sanngiillinermi qaqugukkut inuk siulersuisuni atuuffimminik isumaginnissinnaajunaarsimanersoq aalajangersimasumik piffissalorsorneqarsinnaanngilaq. Tamatumunnga ataatsimeersuarnermi aalajangersimasumik



nalilersuineq apeqqutaassaaq aammalu tassani ingerlatseqatigiiffimmi pissutsit inissisimanerillu immikkut eqqarsaatigineqassallutik.

Siulersuisuni ilaasortaq ilaasortatut atuunnissaminut erseqqissumik piukkunnaateqanngitsutut isigineqarsinnaavoq, assersuutigalugu ilaasortaq siulersuisunut toqqaanermi tunngaviusimagaluartumik pisariaqartumik sulianut pikkorissuseqanngitsoq paasinarsippat.

*Imm. 3-imut*

Aalajangersakkami siulersuisunut ilaasortaq pineqartoq siunnersuummi § 2, imm. 2, nr. 1 – 5-imut naammassinnissimangikkuni piaartumik siulersuisunut ilisimatitsinissamut aammalu piaartumik siulersuisuni ilaasortaajunnaarnissamut, siulersuisuni ilaasortaq pisussaaffilerneqarpoq.

*Imm. 4-imut*

Aktiaatileqatigiiffinni Namminersorlutik Oqartussani pigineqartuni siulersuisuni ilaasortanut sinniisussanik toqqaasarneq ileqqorineqanngilaq. Sinniisussanik toqqaasoqarpat imm. 2 – 3 taamatuttaaq atuutissappat.

*§ 3-imut*

Aktiaatileqatigiiffinnut inatsimmi § 50 naapertorlugu siulersuisuni ilaasortaq sukkulluunniit siulersuisuni ilaasortaajunnaarsinnaavoq. Aktiaatileqatigiiffinnut inatsimmi § 52 naapertorlugu siulersuisunut ilaasortaq nammineersinnaassuseqassaaq aammalu nammineersinnaassuseqarnermut inatsit malillugu pigisaminut aalajangiisinnaassuseqassalluni.

Aktiaatileqatigiiffinnut inatsimmi § 50, imm. 2 oqaaseqatigiit kingulliit naapertorlugit, siulersuisuni ilaasortaajunnaartoq ataatsimeersuarnermi toqqaarneqarsimappat aammalu siulersuisuni ilaasortat sinneruttut aalajangiisinnaassuseqarpata, siulersuisut sinniisussanik qinersinissamut immikkut ittumik ataatsimeersuarnissamut aggersaanngitsoorsinnaapput.

Siunnersuummi § 3-imi aktiaatileqatigiiffinnut inatsimmi § 50, imm. 2 saneqqunneqarpoq. Siulersuisut immikkut ittumik ataatsimeersuarnissamik aggersaasussaatitaanerat pillugu piunasaqaatip tamanna pillugu Inatsisartut inatsisaanni aalajangersagaanera pingaartinneqarpoq, taamaaliornikkut erseqqissarneqarluni ingerlatseqatigiiffik sukkulluunniit tamakkiisumik atorsinnaassuseqartumillu siulersuisoqassasoq.

Piffissap qinersiviusup naanissaa sioqqullugu siulersuisuni ilaasortaq ilaasortaajunnaarpat, siulersuisut piffissap ilaasortaajunnaartup atuuffissaata sinneranut siulersuisuni ilaasortassamik nutaamik qinersinissamut, tamatigut immikkut ittumik ataatsimeersuarnissamut aggersaanissamik pisussaaffeqarput. Siulersuisuni ilaasortaq toqkukut qimaguppat, taamatuttaaq aalajangersagaq atuutissaaq.

#### *§ 4-imut*

##### Imm. 1-imut

Aktiaatileqatigiiffinnut inatsimmi § 51, imm. 1 naapertorlugu ingerlatseqatigiiffimmut siulersuisut qullersaqarfimmi aqutsisuusussanik atorfinitsitsissapput. Siunnersuummi imm. 1-ip kingunerisaanik qullersaqarfimmi aqutsisuusussat siulersuisut piginnaaneqarnissaannut piunasaqaatit assinginik piginnaaneqassapput, takuuk siunnersuummi § 2, imm., 1 aamma tassunga nassuiaatit.

Aalajangersakkami qulakkeerneqarpoq siulersuisut piginnaasaqarnissaannut piunasaqaataasut assinginik inuit sulianut naleqquttumik piginnaasaqartut kisimik pisortatut atorfinitsinneqarsinnaasut.

##### Imm. 2-imut

Qullersaqarfimmi aqutsisuusut akiliisinnaassuseqarnissamut, ataqqinassuseqarnissamut atuussinnaassuseqarnissamullu piunasaqaatit § 2, imm. 2 tassungalu nassuiaatit naapertorlugit siulersuisunut ilaasortanut atuuttut assingi malittussaavaat.

#### *§ 5-imut*

SIKUKI Nuuk Harbour A/S-ip Nuummi umiarsualivik pioreersoq tigussavaa aammalu taassuminnga ingerlatsineq ingerlateqqissallugu.

##### Imm. 2-imut

Ingiaqatigisaanik ingerlatseqatigiiffiup umiarsualiviup nutaap pilersaarusionerqarnera, neqeroortitsivigineqarnera sanaartorneqarneralu ingerlatissavaa. Umiarsualivik nutaaq kimmuinnaq sammisumik talittarfittaqtartillugu aammalu Umiarsualiviup qeqertaanni umiarsualivik nunaminertaqtartillugu sanaartorneqassaaq.

Inissinneqarnera pilerinaateqtartutut isigineqarpoq. Umiarsualivik pioreersoq umiarsualivimmut nutaamut sanaartornermut immikkoortuani allanngortinnagu ingerlanneqarsinnaassaaq. Umiarsualivik nutaaq ingerlaannaq attaveqarnermut pioreersumut attavilerneqarsinnaassaaq, taamatullu kingusinnerusukkut talittarfiup, containerinut nunataata aammalu nunaminertat uninngasuuteqarnermi atorneqartut allilerneqarnissaat periarfissaqarpoq.

Siunnersuummut atugassatut umiarsualiviup nutaap inissisimaffissaatut ilusilersugaanissaatullu naatsorsuutigisanut nunap assingi ilanngussassat ilitsersuutaasut suliarineqarput. Umiarsualiviup inaarutaasumik annertussusissaa, inissisimaffissaa aammalu ilusilersugaanissaa suliami pissusissamisoortumik inaarutaasumik pilersaarusionermit

suliarinninnermullu ilaatillugu allangortinneqarsimasinnaapput. Ilusilersuineq pigineqartoq Seaport Group, NIRAS, INUPLAN aamma ORBICON isumasioqatigalugit suliarineqarpoq.

#### *§ 6-imut*

Nuummi umiarsualivimmik nutaamik sananermut ilaatillugu SIKUKI Nuuk Harbour A/S umiarsualivimmik ingerlatsinermit tunngassuteqartunik illuutunik arlalinnik sanasinnaavoq, tamatuma kingorna umiarsualivimmi suliaqartunut attartortinneqarsinnaasunik. Illuutini taakkunani ilaapput quersuaq, sannavik, allaffeqarfiit illutassaat il.il.

Naatsorsuutigineqarpoq inaarutaasumik sanaartornissamut pilersaarusioreq, pilersaarusiornermut tunngavissap pisariaqartup ilusilersorneqarneranut ilaatillugu, Namminersorlutik Oqartussanit akuersissuteqarfigineqartussaassasoq, takuuk siunnersuummi § 8 tassungalu nassuiaatit. Tamanna pereerpoq, pilersaarut suliariumannittussarsiorneqareerpoq neqeroorutillu tiguneqarlutik

Quersuarmut atasumik Royal Arctic Line A/S nutaamik allaffeqarfimmik qullersaqarfiliornissamut pisinnaatinneqarpoq. Pilersaarutigineqarpoq quersuup ilaatut allaffeqarfiit quleriiaat 4-it katillugu 2.620 m<sup>2</sup>-inik angissuseqartut sananeqassasut. Umiarsualivissamut ingerlatseqatigiiffimmit pilersaarutaavoq allaffeqarfinnut quleriiaanut 4-inut sanaartornissaq taanna Royal Arctic Line A/S-imit akuerineqartussanngorlugu saqqummiunneqassaaq.

#### *§ 7-imut*

Kommuneqarfik Sermersuumut isumaqatigiissutigineqarpoq attaveqarnermut suliassanut soorlu nutaanik aqqusinniornermut, aqqusinermit qullernut angallannermit malitassiuusunut il.il. kommuni akisussaasuussasoq aammalu taakkununga aningaasartuutit akilissallugit.

Siunnersuummi § 7-imi Nuummi nutaamik umiarsualiviliornermut atatillugu kommunip sanaartorfissagissaaneranut aningaasartuutit, nuna tamakkerlugu pilersaarusiornermut immikkut soqutigisanut sanaartorfigiuminarssaanermut atasunut tunngatinneqarsinnaasut, erseqqinnerusumik agguarneqarnissaat pillugu Kommuneqarfik Sermersuumut isumaqatigiissuteqarnissamut Naalakkersuisut piginnaatinneqarput.

Nunami sanaartugartaqartumik illuutitaqartumillu umiarsualiviliornissamut sanaartornermut missingersuutini pigineqartuni naatsorsuutigineqarpoq, SIKUKI Nuuk Harbour A/S-ip Qernertanut aqqusinermit aqquataasussamut nutarterinermullu aningaasartuutinut 40 mio. koruunit akilissagai.

### *§ 8-imut*

Nuummi umiarsualivimmik nutaamik sanaartornissaq ingerlatsinissarlugu siunertaralugu aktietigut ingerlatseqatigiiffimmik pilersitsinissaq pillugu aalajangiineq Inatsisartut siusinnerusukkut akuersissutigaa taavalu ingerlatseqatigiiffimmut umiarsualivimmullu tunngatillugu malitassat pillugit Inatsisartut inatsisissaannut siunnersuummik Naalakkersuisut saqqummiusseqqullugit.

UKA2013/18-imut tunngavilersuutitut allassimasutut Nuummi umiarsualivik nutaaq kimmut sammisumik talittarfittaqtartillugu aammalu qeqertat Qeqertat aamma Fyrø-p akornanni ungalusaasumik umiarsualivik nunaminertaqtartillugu alliliinissarlugu periarfissaqtartillugu sanaartorneqassaaq.

Inatsisartut UKA2013/18-imik akuersineranni aammalu Inatsisartut inatsisissaattut siunnersuummi matumani aalajangersarneqarpoq, Nuummi umiarsualivimmik nutaamik nunami sanaartugartaqtartumik illuutitaqtartumillu sananissamut pilersaarusiorneq sanaartornerlu annertuumik inuiaqatigiinni soqutigisarineqartoq. Siunnersuummi § 8-imi aalajangersagaq ilanngunneqarpoq, Nuummi nutaamik umiarsualiviliornissamut pilersaarusiornermut sananerullu suliarineqarneranut pilersaarusiornikkut tunngaviusut pillugit suulluunniit nalorninartortaasut pakkersimaarniarnissaat.

Siunnersuummi § 8-imut naapertorlugu Naalakkersuisut aalajangersinnaapput, nuna tamakkerlugu pilersaarusiornermut malitassat sukumiisunik aalajangersagartaqtartut kommunimut pilersaarutitut inatsisitigut sunniuteqartinneqassasut. Tamanna isumaqarpoq Naalakkersuisut aalajangersinnaasut, Nuummi umiarsualivimmik nutaamik nunami sanaartugartaqtartumik illuutitaqtartumillu sananissaq, kommunimut pilersaarut Sermersooq 2024-imut tapiliussartaqanngitsumik aammalu nuna tamakkerlugu pilersaarusiornermut malitassani aalajangersakkat tunngavigalugit aallartinneqarsinnaasoq.

Piginnaatitsissummi kommunimi pilersaarummut tunngavissaqannginnerup imaluunniit taassuma naammanginnerata malitsigisaanik suliassap kinguaattoornissaata pinngitsoortinnissaanut Naalakkersuisut periarfissinneqarput. Taamaattoq Kommuneqarfik Sermersuup kommunimut pilersaarummut tapiliussamik suliassap ilusilersorneqarnera pioreersoq malillugu kinguaattoornertaqanngitsumillu suliarineqarsinnaanissaanut periarfissiisussamik suliaqarnissaq akuersinissarlugu naatsorsuutigaa.

### *§ 9-imut*

Aalajangersakkami Nuummi umiarsualivimmik nutaamik sananissamut pisariaqarsimappat, Naalakkersuisut pinngitsaaliissummik taarsiissutitalimmik pigisanik

piginnikkunnaarsitsinissamik aallartitsisinnaanerat inatsisitigut tunngavissinneqarpoq. Inatsisitigut tunngavissami aamma pinngitsaaliissummik taarsiissutitalimmik pigisanik piginnikkunnaarsitsineq tamatumunnga atatillugu sanaartorfissagissaanermut ilaatillugu pisariaqartuq ilaatinneqarpoq.

Aqquersuutitut sanaartukkanut tunngatillugu pinngitsaaliissummik taarsiissutitalimmik pigisanik piginnikkunnaarsitsineq pisinnaavoq, assersuutigalugu sanaartukkanut nutaanut, allilerinernut aamma sanaartukkanik pioreersunik allangortitsineq, atortuutitut assersuutigalugu imaarsaaveqarfiit.

Aqqusinernut tunngatillugu pinngitsaaliissummik taarsiissutitalimmik pigisanik piginnikkunnaarsitsineq pisinnaavoq, assersuutigalugu sanaartukkanut nutaanut, allilerinernut aamma sanaartukkanik pioreersunik allangortitsineq, atortuutitut aammalu ilassutitut aqqissuussanut pisariaqartunut, ilanngullugit biilinit uninngaartarfiit, aqqusernit sinaanni kussinerit aamma apummut ilitsivissatut nunaminertat.

Pinngitsaaliissummik taarsiissutitalimmik pigisanik piginnikkunnaarsitsineq, pinngitsaaliissummik taarsiissutitalimmik pigisanik piginnikkunnaarsitsisarneq pillugu Inatsisartut inatsisaat nr. 25, 30. oktober 1992-imeersumi maleruagassat malillugit pissaq. pinngitsaaliissummik taarsiissutitalimmik pigisanik piginnikkunnaarsitsinermi taarsiissutissap angissusissaa, assingusumik aqqissuussaqaqqinnerna pissutigalugu, pinngitsaaliissummik taarsiissutitalimmik pigisanik piginnikkunnaarsitsineq pillugu inatsit tunngavigalugu aalajangersarneqassaaq.

Tunngaviusut pigineqartut tunngavigalugit naliliisoqarpoq Nuummi umiarsualivik nutaaq pinngitsaaliissummik taarsiissutitalimmik pigisanik piginnikkunnaarsitsinissamik pisariaqartitsiviunngitsumik sananeqarsinnaasoq. Aalajangersagaq suliassami iluarsinerit pigisanut aalaakkaasunut pisinnaatitaaffinnik pioreersunik kalluaassagaluarpata tamanna sillimaffiginarlugu ilanngunneqarpoq.

#### *§ 10-imut*

##### **Imm. 1-imut**

Aalajangersakkami aalajangersarneqarpoq Nuummi umiarsualiviup nutaap nunami sanaartugartaqartup aammalu arlalinnik illuutitaqartup sanaartorneranut aningaasalersuinissamut SIKUKI Nuuk Harbour A/S taarsigassarsiniarsinnaassoq. Tassunga taarsigassarsiniarnissamut ataatsimeersuarnermi akuersissuteqarsimanissaq piunasaqaataavoq.

Aalajangersakkami ingerlatseqatigiiffiup ulluinnarni ingerlanneqarneranut aningaasalersuinissamut nalinginnaasumik akiliutigieriaannagassanik akiitsortassanik pilersitsinissaq pillugu siulersuisut aalajangiinerat ilaatinneqanngilaq.



## Imm. 2-imut

Aalajangersagaq ilanngunneqarpoq, taarsigassarsititsisarfinit akuusunit pilerinaateqartunik atugassaqartitsiviusumik taarsigassarsitsinissamut imaluunniit taarsigassarsitsinermut tunngaviusussatut Namminersorlutik Oqartussanit qularnaveeqqusiisoqarnissaanik piunasaqaateqartoqarluni pisoqarnerani tunngaviusussamik.

Qularnaveeqqusiissutaasimasinnaasut annertussusissaat sioqqutsisumik missiliornissaat ajornarpoq imaluunniit pisariaqarani. Tamatumunnga aalajangersimasumik nalilersuineq apeqqutaassaaq. Aammattaaq aningaasanut inatsimmi imaluunniit ilassutitut aningaasaliissutinut inatsimmi aningaasaliissuteqarnissamut inatsisitigut tunngavissanik pilersitsisoqartariaqartussaassaaq.

## § 11-imut

SIKUKI Nuuk Harbour A/S-ip pilersinneqarneranut aammalu umiarsualiviup nutaap nunami sanaartugartaqartup illuutitaqartullu aningaasalersorneqarneranut ilaatillugu, umiarsualiviup pioreersup aallarniutissatut akiliutigineqarnera kiisalu taarsigassarsianut uppersaait sananeqarneri il.il., naqissusiinermut akitsuusiisarneq pillugu Inatsisartut inatsisaanni maleruagassat atuuttut malillugit naqissuserneqartussaataassapput.

SIKUKI Nuuk Harbour A/S Namminersorlutik Oqartussanit pigineqartussaavoq aammalu ilaannakortumik aningaasalersorneqartussaalluni. Naqissusiinermut akitsuummik akiliuteqarnissamik piunasaqaateqarnikkut ingerlatseqatigiiffiup aningaasaatitigut sillimmatissaasa annertunerusumik tatisimaneqarnissaat tulluartaanngilaq. Nuummi umiarsualiviup atuutereersup aallarniutissatut akiliutigineqarnerinnaa 30 mio. koruuninik naleqartutut missiliorneqartoq, pigisanik aalaakkaasunik tunniussinermi naqissusiinermut akitsuummumut kr. 450.000-inik akeqartussaavoq. Taarsigassarsianut tunngatillugu taarsigassarsianut uppersaait 500 mio. koruuninik annertussuseqartut naqissusiinermut akitsuummumut 7,5 mio. koruuninik akeqartussaapput.

## § 12-imut

### Imm. 1-imut

Imm. 1-imi erseqqissarneqarpoq ingerlatseqatigiiffiup eqqartuussivimmi suliaakkiissutigineqarnera taamaallaat Kalaallit Nunaanni Eqqartuussivinni siullertut suliarinnittussatut suliaakkiissutigineqarsinnaasoq. Kalaallit Nunaanni Eqqartuussiviit taamaalillutik ingerlatseqatigiiffimmut piunasaqaateqarluni suliaasanut sunulluunniit tamaginnut saneqqunneqarsinnaanngitsumik eqqartuussivittut suliaqartartussaapput. Kalaallit Nunaanni eqqartuussivimmik suliarinnittussamik toqqaasarnermut maleruagassat nalinginnaasut malillugit, takuuk Kalaallit Nunaanni eqqartuussisarneq pillugu inatsimmi §§ 55-57, aallaaviatigut eqqartuussisoqarfiit siullertut suliarinnittussatut eqqartuussinermik

suliaqartartuusussaapput. Taamaattoq Kalaallit Nunaanni eqqartuussisarneq pillugu inatsimmi § 55, imm. 1-imi aamma § 57, imm. 1-imi piumasaqaataavoq, inatsimmi, Inatsisartut inatsisaanni, Inatsisartut peqqussutaanni (maannakkut inatsisartut inatsisaat) immikkut inatsisiliornikkut eqqartuussiviit sulianut aalajangiisinnaatitaaffiannik maleruagassiisoqarsinnaasoq.

Taamaaliornikkut pingaartinneqarpoq suliat ingerlatseqatigiiffiup Nuummi umiarsualivimmik sanaartornermut ingerlatsinermullu suliaqarneranut tunngassuteqartut taamatut ajornakusoortumik, tunngaviummik annertuumillu akuliuffiusumik iluseqassasut naatsorsuutigineqartariaqartoq, taakkua eqqartuussivinni suliarineqarnissamut naleqqutinngitsutut sioqqutsisumik isigineqartariaqarlutik.

Imm. 1-imi ingerlatseqatigiiffimmut piumasaqaateqarluni suliassap eqqartuussisoqarfimmi, taanna sumiiffimmi piginnaaneqartuunissaq pillugu maleruagassat nalinginnaasut malillugit piginnaaneqarsimasinnaagaluarpalluunniit, suliakkiissutigineqarsinnaanera mattunneqarpoq.

Imm. 1-imi ilaatigut qulakkeerneqassaaq ingerlatseqatigiiffik Kalaallit Nunaanni Eqqartuussivimmit siullertut suliarinnittussatut allaanerusumi sumiiffinni allani suliakkiissuteqarfigineqartassanngitsoq, aammalu ingerlatseqatigiiffik maleruagassanik allanik malinnittussaatinneqassanngitsoq, ilanngullugit Kalaallit Nunaannut inatsisinik toqqaanissamut maleruagassat atuuttut malillugit allaanerusunit taarsiissuteqarnissamut akisussaaffeqarneq pillugu.

Imm. 2-imut

Imm. 2 malillugu ingerlatseqatigiiffik aallaaviatigut siunnersuut malillugu ingerlatseqatigiiffiup suliaqarneranut tunngatillugu piumasaqaatit pillugit sunilluunniit Kalaallit Nunaanni Eqqartuussivinni siullertut suliarinnittussatut suliakkiissuteqarluni tunniussisinnaavoq, ilanngullugit suleqataasumut Kalaallit Nunaanni imaluunniit nunani allani angerlarsimaffeqartumut inuinnarnut inatsisit malillugit piumasaqaatit. Aallaavisoq taanna taamaallaat saneqqunneqarsinnaavoq, nunani tamalaani isumaqatigiissutit imaluunniit ingerlatseqatigiiffiup pilersuisuminut imaluunniit kiffartuussisuminut isumaqatigiissutai malillugit allatut pisoqartussaasimappat.

Kalaallit Nunaanni Eqqartuussivinni siullertut suliarinnittussatut suliat taamaattut suliakkiissutigineqartarnissaat pillugu maleruagassaaq, Kalaallit Nunaanni eqqartuussisarneq pillugu inatsimmi eqqartuussivimmik suliarinnittussamik toqqaasarnermut maleruagassanut nalinginnaasunit allaaneruvoq, taanna malillugu aallaaviatigut eqqartuussiveqarfiit siullertut suliarinnittussatut suliakkiissuteqarfiusartussaammata.

Inatsisartut inatsisaat manna malillugu ingerlatseqatigiiffiup suliaqarnera paasineqassaaq, suliassaq ingerlatseqatigiiffiup Nuummi umiarsualivimmik sanaartornissamut ingerlatsinissamullu suliaqarnissaanut tunngassuteqassasoq. Suliassat ingerlatseqatigiiffiup



nalinginnaasumik niuernikkut ingerlatsineranut nalinginnaasumut tunngassuteqartut, soorlu allaffimmi atortunik pisinerit, atorfinitsitsinermit inatsisit il.il., Kalaallit Nunaanni eqqartuussisarneq pillugu inatsit naapertorlugu eqqartuussivimmik suliarinnittussamik toqqaasarnermut maleruagassat nalinginnaasut malinneqassapput.

Imm. 3-imut

Imm. 3 malillugu suliat imm. 1 aamma 2 malillugit suliaakkiissutigineqartut, Kalaallit Nunaanni eqqartuussivimmit aalajangiiffigineqassapput. Tamanna nalinginnaasumik inatsisinik toqqaasarnermut maleruagassat malillugit aallaaviussaaq, kisianni nunap allap inatsisai imaluunniit nunani tamalaani maleruagassat atorneqassasut ingerlatseqatigiiffiup aallaaviatigut isumaqatigiissuteqannginnissaata qulakkeerneqarnissaa aalajangersakkami taamatuttaaq siunertaavoq.

*§ 13-imut*

Siunnersuut [www.nalaakkersuisut.gl](http://www.nalaakkersuisut.gl)-imi nalunaarutigineqarnermini atuutilissaaq. Taamaattoq siunnersuummi § 12 ulloq 23. december 2013 aallarnerfigalugu atuutilerpoq.

Taamaaliornikkut ingerlatseqatigiiffiup aningaasaatinit tunngavissanut suliaasaanullu inatsisitigut sinaakktissat UPA 2015-imi politikikkut suliarinninnerup ajornartinnigippagu sapinngisamik sukkanerpaamik inissinneqarnissai pingaartinneqarpoq.

Naqissusiinermut akitsuummik akiliisitsinnginnisaaq ulloq 23. december 2013 SIKUKI Nuuk Harbour A/S-ip pilersinneqarneranit atuutilissaaq taamaalillunilu Nuummi umiarsualiviup atuutereersup kr. 30 mio.-inik nalilimmik aallarniutissatut akiliutigineqarneranut naqissusiinermut akitsuummik akiliisoqassanngilaq. Naqissusiinermut akitsuummik akiliisitsisoqareersimappat taanna ingerlatseqatigiiffimmut utertillugu akilerneqassaaq.